

東
華
續
錄

東華續錄

乾隆二

臣王先謙敬編

臣周潤蕃恭校

十一月丙申朔命纂修 大行皇帝實錄○諭各省教職乃師儒之官所以訓迪約束爲多士之表率也若不賞給品秩則與雜職無異恐地方之人不加禮貌而本人亦遂以冗散自居不知殫心課士以盡職任其應如何加給品級以示鼓舞責成之意著吏部議奏尋議教授係從九品加爲正七品學正教諭訓導係未入流學正教諭加爲正八品訓導加爲從八品升轉仍照舊例從之○丁酉諭朕聞外省百姓有生計稍裕之家每遇喪葬之事多務虛文侈靡過費其甚者至於招集親朋鄰族開筵劇飲謂之鬧喪且有於停喪處所連日演戲而舉殯之時又復在途扮演雜劇戲具

者從來事親之道生事死祭皆必以禮得爲而不爲與不得爲而爲之者均爲非孝是知各循其分乃能各盡其孝初不以奢靡相尙也况當哀痛迫切之時而顧聚集親朋飲酒演劇相習成風非惟於禮不合抑亦於情何忍此甚有關於風俗人心不可不嚴行禁止著各省督撫等通行明切曉諭嗣後民間遇有喪葬之事不許仍習陋風聚飲演戲以及扮演雜劇等類違者按律究處務在實力奉行毋得故爲寬縱○諭辦理天下事務貴得其平必是非輕重無絲毫或爽而後可以協天理而當人心况刑罰尤宜慎重萬不可因奉旨發審遂存迎合避嫌之心與其失出甯爲失入而輒置人於重法也卽如戴瀚科場一案朕因未得真情特命王大臣會同刑部審理今議以戴瀚聞 大行皇帝升遐之後言笑自若照忌辰演戲之例擬斬監候具奏戴瀚如科場舞弊果眞卽宜

置之重典若場中談笑自若乃無實據可憑者豈可因此以入重罪乎況比照忌辰演戲之例更不相符許秉智鈔寫文字正副考官分東西校閱以及刪改進呈試卷各條情節審訊俱未周到著王大臣覆加詳審另議具奏請旨大凡發審事件因是非真假不能一時遽定故命廷臣讞鞫若其初情罪確實無復疑似便可卽置於法不待推問矣至發審之後實係無辜何妨卽行開釋儻因朕發審之故而恐審虛免罪有礙前旨必欲周內其罪則竟視朕爲飾非文過之主矣夫視朕爲飾非文過之主何如待朕爲虛衷愼刑之主乎况係欽案而擬罪加重則刑法失平啟眾人之議論何以服遠近而昭勸懲乎若欽犯案件一例擬斬是視爲固然不應斬者固屬冤抑而應斬者亦爲不應斬之人矣至於恩出自上之說尤爲不可儻朕一時不能詳察則失入者必多輿情我 太

祖高皇帝諭旨凡有罪之人執訊不可不嚴而定罪不可不慎洵足垂戒萬世爲用刑之準則嗣後凡各直省有刑名之責者毋執成見毋挾偏私務各虛心聽斷胥歸平允以共體上天好生之心用襄國家祥刑之治○以圖理琛署工部右侍郎由內閣學士署○己亥轉木和林爲刑部左侍郎以納延泰爲刑部右侍郎由理藩院左侍郎遷王國棟署刑部侍郎○庚子諭張照自到黔省以來挾詐懷私擾亂軍務罪過多端張照來京時著交總理事務王大臣會同刑部確查嚴審定擬具奏○改廣西思恩協爲營鎮安營爲協○辛丑諭四民之中惟農夫作苦自食其力最爲無愧飭庀八材以利民用非百工莫備士則學大人之學故錄其賢者能者至於商賈阜通貨賄亦未嘗無益於人而古昔聖王尙慮逐末者多令不得衣絲乘車推擇爲吏以重抑之今僧之中有號爲應付者各分房頭世

守田宅飲酒食肉並無顧忌甚者且畜妻子道士之火居者亦然夫一夫不耕或受之飢一女不織或受之寒多一僧道卽少一農民乃若輩不惟不耕而食且食必精良不惟不織而衣且衣必細美室廬器用玩好百物爭取華靡計上農夫三肉袒深耕尙不足以給僧道一人不亦悖乎朕於二氏之學皆洞悉其源流今降此旨並非博不尙佛老之名也蓋見今之學佛人豈特如佛祖者無有卽如近代高僧能外形骸清淨超悟者亦稀今之道士豈特如老莊者無有卽如前世山澤之癯能凝神氣怡養壽命者亦稀然苟能遵守戒律焚修於山林寂寞之區布衣糲食獨善其身猶於民無害也今則不事作業甘食美衣十百爲羣農工商賈終歲竭蹶以奉之而蕩檢踰閑於其師之說亦毫不能守是不獨在國家爲游民卽繩以佛老之說亦爲敗類而可聽其耗民財溷民俗乎

著直省督撫飭各州縣按籍稽查除名山古剎收接十方叢林及雖在城市而願受度牒遵守戒律閉戶清修者不問外其餘房頭應付僧火居道士集眾面問願還俗者聽之願守寺院者亦聽之但身領度牒不得招受生徒所有貲產如何量給還俗及守寺院者爲衣食計其餘歸公留爲地方養濟窮民之用並道士亦給度牒之法該部詳細妥議具奏○論吏部月選官員引見每先期考試履歷蓋看其通曉文義與否若有條奏事宜更可觀其識見卽虞廷敷奏以言之意也朕近覽月官履歷率多頌聖泛語鋪張功德滿幅盈篇閱之殊爲可厭夫先資拜獻貴於抒寫誠惓似此粉飾浮夸豈朕樂聞頌揚之詞而爲廷試之舉耶嗣後考試月官履歷如果伊等於政治確有所見准其據實條陳或自述何以居官何以莅事亦准敷納若胸中無欲吐之言止許繕寫履歷其濫用

頌聖套語者槩行禁止○壬寅吏部等部議准署湖廣總督過佳
奏忠崗宣撫司田光祖十五土司公懇歸流分設一府五縣以資
治理請於恩施縣地方建設府治以原設恩施縣爲附郭首邑施
南司桐子園大田鎮官渡壩四處各設縣治隸新設知府轄新設
府及先設之彝陵府歸荊州道統轄其歸荊州道原轄之安陸府
改隸襄陽道德安府改隸武漢黃道統轄一府五縣營制汛防應
設副將一員馬步守兵千五百五十七名聽彝陵鎮總兵統轄四
川夔州府屬建始縣去恩施不過百里改歸新設府轄議定府名
曰施南附郭縣曰恩施屬縣曰宣恩來鳳咸豐利川移建始來屬
從之○乙巳諭國家久道化成人文蔚起 皇考樂育羣材特降
諭旨令直省督撫及在朝大臣各保舉博學鴻詞之士以備制作
之選乃直省奉詔已及二年而所舉人數寥寥朕思天下之大人

材之眾豈無足膺是舉者一則各懷慎重觀望之心一則衡鑒之明視乎在己之學問或已實空疏難以物色流品此所以遲回而不能決也然際此盛典安可久稽朕用再爲申諭凡在內大臣及各直省督撫務宜悉心延訪速行保薦定於一年之內齊集京師候朕廷試儻直省中實無可舉亦卽具本題覆○諭朕聞江南太平府蕪湖縣有雜辦江夫河逢錢糧歲徵銀二千三百零四兩歷年已久房屋傾圯而額稅仍存小民輸納艱難頗爲地方之累朕卽位以來勤求民隱已降旨禁革雜稅此卽雜派中之先宜豁免者著該督撫遵旨將此項錢糧二千三百零四兩卽行寬免永著爲例○諭朕聞吉凶異道不得相干故娶在三年之外而聘在三年之內者春秋猶以爲非禮記稱大功之末可以冠子可以嫁子父小功之末可以娶婦己雖小功旣卒哭可以冠娶妻三年之喪

痛深創鉅苟有人心者必宜於此焉變矣乃愚民不知禮教起於
卑隸編氓之家有慮服喪之後不得嫁娶乘父母疾篤及殯殮未
終而成婚者其後商賈中家多有之士大夫亦聞爲之而八旗效
之朕實憫焉自今伊始自齒朝之士下逮門內有生監者三年之
喪終喪不得嫁娶違者奪爵褫服其極貧卑隸編氓父母卧疾呻
吟床褥必賴子婦以躬薪水治饔飧者聽其迎娶盥饋俟疾愈喪
畢而後成婚古者禮不下庶人其斯之類歟曾子問親迎女在途
而壻之父母死女改服布深衣縞總以趨喪亦此義也其商賈中
家不必以士大夫之禮繩之然人性皆善朕知其必有觀感興起
而不忍自同於氓隸者矣○丁未恭上 大行皇帝尊諡曰 敬
天昌運建中表正文武英明寬仁信毅大孝至誠憲皇帝 廟號
世宗○戊申追封 皇太后曾祖額宜騰祖吳祿俱爲一等公

父凌柱封爲一等公世襲罔替○晉封貝勒允禕郡王允禔貝勒

允祜允祁之母追封誠親王允祕之母俱爲嬪○追封皇一兄弘

暉皇八弟福慧爲親王○召邁柱來京以史貽直署湖廣總督戶

部尚書署○庚戌以孫嘉淦爲左都御史由吏部右侍郎遷○辛亥賜公凌柱

世襲佐領○壬子諭戶部聞晉省大同朔平二府辦納本色米豆

一項向例按里徵收腳價距倉三四百里者每石增至腳價銀三

四錢不等輸納太重民力難支此不但與通省錢糧之火耗懸殊

卽以大朔二府所屬州縣相距倉廩遠近而計離倉愈遠腳價愈

多亦不免偏枯嗣後除離倉最近之州縣向係糧戶自行赴倉交

收者仍聽民便令其自運不徵腳價外其餘州縣每石米豆止徵

車腳銀一錢此外不敷之運費著於司庫存公耗羨銀內撥給添

補令各該州縣官承領雇運不得絲毫剋減及私行派擾再聞每

米豆一石向例徵收加耗糧八升亦覺太重嗣後每石免耗糧四升止徵耗糧四升以二升爲州縣等沿途虧折之耗二升爲存倉鼠雀之耗諒無不敷均自本年始永遵爲例○命慶復爲定邊大將軍○增設廣西右江鎮遊擊一員○免雍正十二年以前兩淮竈戶舊欠○癸丑嚴禁銷毀制錢○甲寅諭貴州古州台拱等處自古未沾王化其地實在數省疆域之中是以調兵進剿朕卽位以來內外咸與維新卽彼生苗亦在血氣之倫若能聞詔輸誠當悉貰其罪○諭果親王爲皇考宣力多年向因氣體稍弱聖懷時時體恤令在邸第辦事以保護精神卽遺詔中亦拳拳諭及自朕卽位以來王總理事務夙夜勤勞今天氣正寒朕心深爲廕念俟過百日後或隔數日一入內直或天氣晴暖時隨便入見所有應辦事宜卽在邸第辦理○免貴州三年內耗羨銀兩○丙

辰恭上 孝敬憲皇后尊諡曰 孝敬恭和懿順昭惠佐天翊聖
憲皇后○諭河南地方自田文鏡爲巡撫總督以來苛刻掇求以
嚴厲相尙而屬員又復承其意指剝削成風豫民重受其困卽如
前年匪災不報百姓至於流離蒙 皇考降旨嚴飭遣官賑恤始
得安全此中外所共知者乃王士俊接任河東不能加意惠養且
擾亂紛更以爲幹濟借墾地之虛名而成累民之實害彼地民風
淳樸竭蹶以從罔敢或後甚屬可嘉然先後遭督臣之苛政其情
亦可憫矣王士俊著解任來京候旨河南仍照舊例止設巡撫卽
著工部侍郎富德補授並將朕旨宣示豫民咸使聞知○丁巳諭
往者 聖祖仁皇帝特製臺省之箴以專言責 皇考世宗憲皇
帝諭旨亦諄諄及之洵以耳目之司乃國是所由彰官常所由肅
也朕以藐躬續承丕緒一日萬幾常恐措置失宜以負 皇考付

託之重繩愆糾謬正爾諸臣得自竭其忠誠之會也中外大臣或有詭法行私及昏庸不能任職者近者實迹有徵遠者輿論不協皆宜據實彈劾以廣朕之聰明而近觀諸臣所奏大率毛舉細故無關體要朕以實心求言而專司言責者乃以虛文塞責無乃內負夙心而外慚清議乎其各自砥助凡有關於國政民依者知無不言若仍以不急之務漫充奏牘或其人已自敗露而後撫拾其非又安用此言官爲耶至於懷私挾怨受人指屬互相攻訐乃

聖祖之箴所謂尤爲不臧者有或蹈此乃自貽伊戚也勉之慎之

○實授鍾保湖南巡撫召常安來京以俞兆岳爲江西巡撫

由太僕寺

鄉

○戊午以平郡王福彭協辦總理事務○調木和林爲吏部侍郎

起法敏爲刑部侍郎

原任陝西巡撫

○己未諭朕聞東省泰山碧霞靈

應宮凡民人進香者俱在泰安州衙門輸納香稅每名輸銀一錢

四分通年約計萬金無力輸稅者卽不許登山入廟此例起自前明迄今未革朕思小民進香禱神應聽其意不必收取稅銀嗣後將香稅永行蠲除如進香人民有願捨香錢者各隨願力不得計較多寡亦止許本山道人收存以資修葺祠廟山路等費不許官吏經手絲毫染指永著爲例○諭王大臣等據張廣泗奏抵黔省鎮遠地方查詢苗疆情形雖用兵數月仍茫無頭緒大路雖可行走而逆苗時出燒劫生苗內爲首大寨全然負固從前起事之時元展成以熟苗必不致反哈元生又以爲苗人不難撲滅而張照立意阻撓以巧詆爲能而置應辦之事於不理及調集各省兵丁數萬餘名哈元生但於大路沿途密布而所用以攻剿之師不過一二千人東西奔救顧此失彼董芳駐守八弓僅以招撫爲可了事較之哈元生更全無實際張照於董芳所辦之事極口贊揚於

哈元生所辦之事痛加醜詆分兵分地以致哈元生束手無措張照倚董芳爲援董芳以張照爲可恃文移往來互相攻訐一切軍機事宜皆各行其意從無一字相商所以大兵雲集已經數月而毫無成效等語張照受皇考深恩伊又自請前往苗疆辦理效力乃居心深險行事乖張種種挾詐懷私擾亂軍務昨已交刑部嚴訊今據張廣泗參奏前來張照著革職拏問將前後事情及張廣泗摺內所參各件一一嚴審定擬具奏董芳自請前往黔省領兵效力蒙皇考賜以副將軍職銜厚加賞賚令其與哈元生同心共濟早奏膚功乃伊以張照爲可恃與哈元生有意齟齬事事各行其意並不彼此相商且駐守八弓臨敵不前僅以招撫爲可了事董芳著革職拏解來京嚴審定擬元展成身爲巡撫親在地方不能撫綏以致逆苗猖獗且文武不和互相推諉及至逆苗全

煽黔民受其荼毒 皇考及朕先後屢降諭旨令其不可惜費不可苟且務使殫心竭力撫綏安插昨奏報已經賑恤難民事竣回署被難窮民皆不致失所今覽張廣泗所奏是難民並未安頓就緒元展成耽玩公事輕視民命甚負 皇考倚任之恩元展成著革職拏解來京候審其巡撫印務卽著經畧張廣泗兼管哈元生身爲黔省提督軍務是其專司乃逆苗蠢動不能防患於未萌及至調集大兵又不能卽行進剿遲回觀望用兵半載有餘尙毫無就緒應與元展成一併加以嚴懲姑念見在領兵進剿著革去揚威將軍暫留提督之職交與張廣泗差遣委用聽其指示調度若能奮勉效力尙可稍贖前愆若再有怠忽貽誤及剛愎自用之處著張廣泗嚴參將前事一併治罪德希壽與張照同奉差委膺茲重任乃張照如此狂悖乖張伊但隨聲附和今又與張廣泗一同

列名陳奏事件竟似張照之罪與伊毫無干涉者德希壽甚屬無恥亦著革職拏解來京一併審擬至張廣泗所奏苗疆情形及辦理機宜甚爲明晰其料理賑恤事宜亦甚屬妥協各項動用錢糧准其報銷俱著照張廣泗所奏辦理王大臣等可傳諭知之○諭直隸營田乃 皇考教稼養民之至意但事關地方必須本地方有司實力奉行始得裨益朕意將營田觀察使撤回專交地方官管理其如何派道府大員督率稽查之處著總督李衛妥議具奏○癸亥諭向來州縣徵收錢糧因銀色有傾銷之耗折解送有路途之盤費故於正項之外徵收耗羨原無定額其廉潔者尙知自愛不肖者任意徵求而督撫至道府等員於中收受節禮陋規互相容隱弊難究詰嗣經巡撫諾敏田文鏡倡爲提解歸公之法各該督撫就本省情形酌定分數徵收以爲各官養廉及地方公事

之用除所定分數外絲毫不許溢徵蓋以耗羨原屬格外之項與其聽地方官私行徵取不如明定分數使有節制不敢違越也然在未提解以前尙爲私項旣提解以後或恐不肖官員視同正課又得於耗羨之外巧取殃民從前 皇考洞見流弊屢降諭旨欲俟將來虧空全清府庫充裕之日漸減漸革 聖心廬念未或忘之朕紹承大統切念民依孜孜軫恤日與王大臣等悉心籌畫期使吾民於正項之外絲毫無擾而一時勢有未能尙須從容計議惟是提解耗羨之法行之已十有餘年恐日久弊生奸吏貪緣剝削羨外加耗重困閭閻不可不爲深慮著各該督撫嚴飭有司咸體朕意知耗羨一項可減而決不可增可於格外從寬而斷不可額外多索儻於所定分數之外又借估色添數爲名多取絲毫者該督撫卽行題參重治其罪儻督撫徇隱不舉或經科道糾參定

將該督撫等一併嚴加議處再各省耗羨分數率在加一上下然江南賦重之區如蘇松常鎮四府額賦較之他省幾及數倍雍正六年以前每兩加耗僅五分雍正六年以後增至加一且有司又復巧取苛索民何以堪其令江南督撫詳加酌定量減分數徵收不得仍前重耗困民儻敢陽奉陰違朕必於該督撫是問○諭朕聞山西大同偏關老營水泉三汛兵丁向有交納徭銀一項該汛兵丁並無承種田地一經充伍卽按名額徵悉在餉銀內坐扣交納每年約徵收徭銀六百八十兩有奇相沿已久至今未革朕思三汛營兵旣無營業地畝而派納徭銀扣除月餉未免減其養贍之資朕心軫念著從乾隆元年爲始將此項蠲免該部行文晉省巡撫提鎮遵照朕旨永著爲例○諭諸王貝勒貝子公等朕惟治天下之道在親親而親親之道在慎終追遠凡我宗室皆太祖

太宗之子孫理宜親睦無致疏逃昨據爾等具奏服制一事各
分支派朕以未爲允協敕令再議及至晚閒覽內廷尊藏 皇考
在 皇祖時所奏一摺乃知裕親王太福晉薨逝時 皇祖駕幸
園場猶令在宮諸太妃往弔而 皇考及諸皇叔亦俱奏請成服
由此觀之彼時古道猶存也迨皇叔怡賢親王薨逝時 皇考令
朕兄弟詣王府弔慰又令五阿哥成服彼時眾以爲異數之優加
並不以爲事理之當然由此積漸以往將來皇家子孫互相驕侈
而篤親之誼將至湮沒矣朕每以此爲懼古云以父母之心爲心
天下無不和之兄弟以祖宗之意爲意天下無不睦之宗族爾諸
王貝勒貝子公等皆當以 太祖 太宗之心爲心視國事如家
事互相規勸以底於善如此則可以副朕篤親之意而 列祖鴻
基亦以丕振於億萬世矣夫親族者天地之常經務當永遠一例

豈可因君上一時愛憎所降之旨姑任意辦理乎嗣後卽朕之子孫如遇近支尊長之事亦應令成服其諸王屬下人等仍照從前所定支派遵行外諸王貝勒貝子公等應如何成服齊集之處務須準理酌宜以盡篤親之意旨內事理著諸王貝勒貝子公等公同詳議具奏○賞已革宗室阿其那塞思黑紅帶收入 玉牒○甲子諭向來道府缺出俱係吏部開單請旨補授蓋 皇考聖意以郡守監司皆有察吏安民之責必慎重選用始能勝任也在

皇考勤政十有三年周知人才之優劣故能如此辦理今朕卽位之初正在延訪之時尙少眞知灼見可當特簡之選者昨廷臣條奏內有請照往例仍歸部選之奏見交該部議覆朕思道府等缺若槩歸部選恐繁劇緊要之地不得勝任之員若槩由特用不但目前朕意中乏人且恐資深俸久者至於壅滯朕再四思維嗣後

道府缺出或衝繁疲難四者俱備或兼有其三者則令該部開單
請旨其餘悉歸部選如此則於循資較俸之中仍有選才舉能之
義各員既得升補而要地又可得人似於情理允協著該部定議
具奏○諭總理事務王大臣會同刑部審問李禧耿韜之案因伊
不吐實情至於夾訊辦理實爲錯誤夫李禧耿韜存心奸險罪惡
多端其人固不足惜但伊等官職已在大臣之列國家之名器則
宜惜古者刑不上大夫蓋以維國體而勵臣節國體不維則無尊
卑上下之辨臣節不勵則大臣擁高爵大官而有徒隸無恥之心
此賈誼所以諄切辨論也朕欲風勵天下使人各自愛其敦節行
尤宜自大臣始大臣有不自愛者朕仍設廉恥以養之庶動其天
良激勵鼓舞嗣後三品以上大員身罹罪譴卽奉旨革職拏問者
法司亦不得遽加三木如有不得不夾訊者亦必請旨永著爲例

○乙丑經畧湖廣總督張廣泗奏欽奉 聖旨敬據微忱得旨古
州八萬一事實非我 皇考之本懷彼原屬化外不入版圖之人
一旦制之以禮法賦之以租稅雖云最薄最少以示羈縻猶之縛
虎狼以皮革與夫縛之以絲麻其爲不快於中而將償事則一也
故今年逆苗之動至於此極朕覽 皇考批賜尹繼善之摺至於
流涕觀卿此奏猶有護過之意此則不可摺內已批示矣朕惟以
大公至正治天下敬 天勤民爲本懷旣爲天子惟有代 天子
民以盡爲民父母之職而已夫爲民父母而忍視其子之投於水
火而莫之救耶汝等大臣更代朕爲一省之父母者也卽云古州
一事爲將來久遠慮朕恐久遠未及慮而貽害目前之譏雖大學
士鄂爾泰暨汝等始事之人百口置喙不能辭也夫人孰無過過
而能改則無過矣今日之事正我君臣改過之秋若護過則大不

是矣諸凡已悉前諭卽此批示朕亦與王大臣觀之朕之待諸臣
凡事無隱於中因見卿有護過之意故此訓諭至於苗疆一切事
宜惟賴卿盡心料理因恐元展成有所掣肘有旨命卿署理黔撫
矣卿摺奏云明年秋冬事可告竣但一勞永逸卽再遲一二年亦
不妨不可再蹈彼數人之轍而苟且因循此事乃我 皇考所貽
我君臣之最要最重事件於 皇考顏面所關我君臣不可不慎
也○大將軍公慶復奏呈噶爾丹策零來書得旨本日閱爾奏到
噶爾丹策零之書札朕思賊仍望請和又礙難遣使故將伊所攜
去之二人妥爲遣回而言詞中復略形誇大在伊之意以爲若准
請和伊便稍得餘地若被伊言詞激發如前此興兵伊必得微幸
且糧餉立見消乏斯二者均不可行見在我近疆固守伊卽無計
可展然彼旣投書前來我亦應回覆朕已有旨諭令王大臣等議

奏矣並著軍營王大臣等會同將發給噶爾丹策零文書編纂一道迅速由驛發來候朕閱看汝等意見看來形勢秋閒防守甚爲緊要惟王大臣等知之若洩漏於兵丁等致形畏懼於事無益其喀爾喀津巴之發回與否事尙未定須將此旨大意諭兵丁等知之庶軍情可固矣又奏準噶爾情形得旨朕仰遵 皇考眷愛生靈之意統計國家錢糧數目無論準噶爾之和與不和謹守我疆域以養民力彼來時不過挫折銳氣自取敗虧是以深慮遠謀始建息兵之議但一切事務愈加詳細始能有益多用思索方致妥善今觀四部落喀爾喀所議請我兵者有三議息兵者一處而已看來我兵似難遽議撤回昨沁拜亦以暫留見有綠營兵丁奏請已交王大臣等嚴議矣朕思準噶爾賊心甚詭譎若二三年間尙不致起事惟數年之後我兵盡撤伊若潛過阿爾台山梁擾動喀

爾喀等游牧地方惟時歸化城兵不能速到必至喀爾喀等寒心此亦應籌畫之事若一味坐守則數萬兵丁遠戍鄂爾坤等處何時休息汝曾任戶部尙書此數年所費錢糧汝豈不知見在之糧雖足充數年之用若數年後又作何計較見在大軍情形如此錢糧情形又如此總未得一久遠善全之策朕反復思之若將東三省兵亦如歸化城兵令攜帶家口在鄂爾坤駐紮數千在彼耕種而食仍由京城支運錢糧是否相宜之處朕將此旨大槩亦諭額駙策凌伊到彼時爾等相其地勢悉心籌畫詳議具奏若稍有未當之處勿因朕旨遽爾遵循俟汝奏到時朕再思之

十二月丙寅朔命纂八旗氏族通譜○改陝西金塔營遊擊爲副將○丁卯諭王大臣等前令滿漢文武大臣官員科道等輪班條奏自後不必拘定班次隨時陳奏○復設川陝總督裁四川總督

以黃廷桂爲四川提督

因軍務漸竣仍照舊制

○轉徐元夢爲禮部左侍郎

以勵宗萬署禮部右侍郎○以納延泰爲刑部左侍郎○總理事

務王大臣奏覆審考試官戴瀚擅改文字進呈欺詐依律杖一百

徒三年聽從私改之同考官徐煥然扶同進呈之考試官顧祖鎮

杖九十徒二年半從之○己巳諭大學士鄂爾泰張廷玉莊親王

果親王曾奏請各迎 妃母於邸第朕聞奏心甚不安今再四思

維人子事親誠欲各遂其願自今以後每年之中歲時伏臘令節

壽辰二王及各王貝勒可各迎 太妃於邸第其餘仍在宮中則

王等孝養之心與朕敬奉之意庶可兩全和親王分府後亦照此

禮行○諭凡官員丁憂守制者遇有恩詔例不准封朕前已降旨

加恩給予封典其養親回籍之員皆因父母年高棄官歸養幸逮

親存適逢曠典而亦格於成例不得請封情殊可憫著將回籍終

養之員照伊等原官品級一併給予封典遂其孝思○庚午諭據正藍旗蒙古副都統布延圖奏稱福建廣東廣西貴州雲南等省地處極邊界連外國且山林險阻苗民雜處而統兵大員向未補放滿洲請將此五省提督總兵官參用滿洲等語夫人主君臨天下普天率土均屬一體無論滿洲漢人未嘗分別卽遠而蒙古番夷亦並無歧視本朝 列聖以來 皇祖 皇考逮於朕躬均此公溥之心毫無畛域此四海臣民所共知共見者蓋滿漢均爲朕之臣工則均爲朕之股肱耳目本屬一體休戚相關至於用人之際量能授職惟酌其人地之相宜更不宜存滿漢之成見邊方提鎮亦惟朕所簡用耳無論滿漢也昨從尙書來保之請議令緣邊古北口一帶提鎮副參遊守官兼用滿洲者良以滿洲騎射比漢人爲純熟於控制北邊爲相宜並非有意歧視滿漢也無知之徒

妄生揣摩以爲滿洲當親形之奏牘紊亂成規甚爲不合布延圖
著嚴飭行嗣後若有似此分別滿漢歧視旗民者朕必從重議處
布告天下使明知朕意○諭民間買賣田房例應買主輸稅交官
官用印信鈐蓋契紙所以杜奸民捏造文券之弊原非爲增國課
而牟其利也後經田文鏡創爲契紙契根之法豫用布政使印信
發給州縣行之既久書吏夤緣爲奸需索之費數十倍於從前徒
飽吏役之壑甚爲閭閻之累不可不嚴行禁止嗣後民間買賣田
房著仍照舊例自行立契按則納稅地方官不得額外多取絲毫
將契紙契根之法永行禁止至於活契典業者乃民間一時借貸
銀錢原不在買賣納稅之例嗣後聽其自便不必投契用印收取
稅銀其地方官徵收稅課多者亦停其議敘仍著各該督撫嚴飭
藩司時加訪察儻有吏書索詐侵蝕等弊立即嚴行究處無得稍

爲寬縱再在京兩翼收稅之處亦照此例行○甲戌實授圖理琛工部右侍郎○乙亥諭王大臣等八旗大臣等在 皇考時辦理旗務錯謬之處甚多屢蒙 皇考訓誡開導諄復周詳伊等總不能領會 聖訓所辦事專務深刻煩苛以爲如此方可立身無過之地且恐怨歸於已動云出自 聖意此種惡習甚可痛恨朕繼承大統以來諸臣條奏旗務頭緒繁多章程不一是以略加斟酌去其繁冗俾從簡易蓋以事繁則難於辦理事簡則易於遵循所以使之率作興事專心竭力於應辦之件也近聞八旗都統副都統等於會議之時多不到班其到班者往往不以正務爲意或彼此相謔言笑無忌向來公豐盛額性好嬉戲想八旗大臣等從而效之耶凡人於閒居無事之時嘖笑尙且檢點何況身爲大臣在集議緊要之地而肆無忌憚若此有是體乎至於會議到班皆係

奉旨事件如平郡王公訥親等曰在內廷協辦總理事務自不得
分身前往其海蘭旺扎爾策楞永興等皆在御前行走尙且到班
與議而專理八旗事務之大臣轉晏然怠惰輕視公事是何意見
著伊等明白回奏若伊等奉到此旨之後又復不喻朕意但按尋
一二事參劾一二人以爲奮勵振作則又伊等從前苛刻之故智
而非朕申飭之本意也總之辦理事務寬嚴當得其中若嚴而至
於苛刻寬而至於廢弛皆非寬嚴相濟之道嗣後若不悛改朕必
嚴加處分朕降此旨非於卽位之初申飭諸臣以示威欲其畏懼
也蓋以旗務廢弛所關甚大不得不嚴加申飭本欲召入諸臣面
降諭旨恐伊等仍不能領會朕意不過免冠叩首於事仍無裨益
王大臣等可傳旨切諭之伊等俱受國重恩自當各加猛省痛改
前非以副朕之期望○丁丑命各直省酌糶常平倉穀○戊寅恭

上 皇太后徽號曰 崇慶皇太后○己卯諭王大臣等準噶爾
雖遣使乞和防邊之事自宜豫籌縱彼極其恭順遵旨定議亦不
保其久而不變朕意彼之乞請誠與不誠俱可勿論惟嚴備邊疆
而已其嚴備之道又當計其久遠而便益者蓋我大兵之興原爲
保護喀爾喀而駐紮多年旣占彼遊牧之地又用其供運之力在
彼誠不免拮据而內扎薩克蒙古之在軍營者或有一二無知之
徒不免以我等爲喀爾喀故以致歷此艱苦爲辭殊不知眾扎薩
克蒙古等首先歸順於我 太祖 太宗之時與滿洲無異奔走
效力卽如一家喀爾喀等雖在後歸順蒙我 皇祖 皇考歷年
惠愛視伊等亦同一家初無二致此次行師非特保護喀爾喀亦
爲徧安眾蒙古之計也但爲時旣久事多未便經我 皇考洞鑒
念黃教生靈欲息軍旅曾降諭旨朕惟仰體 皇考聖心欲悉撤

大兵休息眾人見今在喀爾喀戍守之兵宜如何撤回應否仍留駐若干駐紮應在何處其喀爾喀之游牧如何防護卡倫後殿如何安置之處著詳悉定議具奏再與準噶爾議定邊界之事已經往召額駙策凌王丹津多爾濟俟其到時令與爾等公同酌議此定界之事乃關繫眾喀爾喀之游牧永遠生計必諮詢部眾公同商定始可受益而扎薩克甚多不便並令至京著行文喀爾喀眾扎薩克等將應如何定界及伊等游牧或用己力防守或仍須內扎薩克與滿洲兵保護著各出己見以聞俾知朕之撤兵並非不念伊等而外視之也特籌其生計有益久遠可行伊等其知朕恩恤之意共計久遠便宜之道定議具奏朕詳覽眾議其言是者朕將斟酌採用卽有未協朕亦容之不加責備也○改總管內務府大臣內閣學士俱爲從二品○庚辰調傅爾丹爲刑部尙書仍兼管

兵部○諭禮部議覆僧道給與度牒一事虛文多而實際少與朕意尙不相符朕之諭令清查僧道者並非博不尙佛老屏斥異端之名也蓋僧道之中有應付火居二種借二氏之名而作奸犯科肆無忌憚恐將來日流日下更無所底止是以酌復度牒之法辨其薰蕕判其真僞使有志焚修者永守清規而市井無賴之徒不得竄入其中爲佛老之玷此乃培護二氏法門之深意望其肅清嚴整若朕有沙汰僧道之心則何不降旨勒令伊等還俗而乃酌復度牒之制慎加甄別有何爲乎至於給發度牒一事若經由僧道錄司之手勢必又滋苛索之弊且禮部議稱度牒一張交銀三錢夫交官者雖僅三錢而本人之所費恐十倍於此矣此等之人亦吾赤子朕豈忍歧視而使之不得其所乎僧有宗門教門律門之分皆遵守戒律清淨焚修者卽應於此中選擇僧錄司以爲緇

流之領袖或亦可行至於應付僧徒皆令受戒給予度牒若不願受戒者勒令還俗此事禮部所議多有未備著總理事務王大臣會同九卿定議具奏若有以此舉爲多事無益僧道而徒滋煩擾者亦准奏聞請旨○實授陳世倌左副都御史○何師儉因病解任以魏定國署西安按察使

原任直隸按察使

○辛巳諭從前陝省地丁

火耗經年羹堯岳鍾琪先後定爲加二以一錢五分作爲各官養廉及一切公費其五分則採買社倉穀石以裕積貯後因積穀已多無事採買則以此五分添助軍需盤費之用此向來情形也今大兵漸撤軍需簡省而仍存加二之耗羨殊非朕愛養秦民之至意著將此五分卽行裁減儻未了軍需項下有應用之處卽於公費項下支給該督撫務體朕意督率有司實力奉行俾秦民均沾惠澤○壬午諭朕臨御以來加惠元元將雍正十二年以前各省

民欠錢糧悉行寬免誠以民爲邦本治天下之道莫先於愛民愛民之道以減賦蠲租爲首務也惟是輸納錢糧多由業戶則蠲免之典大槩業戶邀恩者居多彼無業貧民終歲勤動按產輸糧未被國家之恩澤尙非公溥之義若欲照所蠲之數履畝除租繩以官法則勢有不能徒滋紛擾然業戶受朕惠者十苟捐其五以五惠佃戶亦未爲不可近聞江南已有嚮義樂輸之業戶情願捐免佃戶之租者閭閻興仁讓之風朕實嘉悅其令所在有司善爲勸諭各業戶酌量減彼佃戶之租不必限定分數使耕作貧民有餘糧以贍妻子若有素豐業戶能善體此意加惠佃戶者則酌量獎賞之其不願者聽之亦不得勉強從事此非捐修公項之比有司當善體朕意虛心開導以興仁讓而均惠澤若彼刁頑佃戶藉此觀望遷延則仍治以抗租之罪朕視天下業戶佃戶皆吾赤子恩

欲其均也業戶沾朕之恩佃戶又得拜業戶之惠則君民一心彼此體恤以人和感召天和行見風雨以時屢豐可慶矣○諭河防隄岸閘壩等項一切工程凡有關運道民生者定例俱動正項錢糧應用乃各省竟有於田畝捐派者豈果出自小民之願大都上司因節省錢糧起見授意屬員爲粉飾之計相沿日久官吏藉端苛索民間所費必致數倍不特苦累民生亦於國計無補朕聞山東省挑挖運河每年有派幫民夫工食銀五萬三千四百餘兩江南松江海塘歲修有每畝捐錢五文京口挑挖運河每年於蘇松常鎮太等府州照數徵漕糧正耗米協解銀三千八百餘兩蘇松常鎮太通六府州應修河渠閘壩令長洲等三十三州縣按畝派錢五文三文二文不等以供大修並令每畝又酌量捐錢以爲歲修四川歲修隄堰令每畝派銀一二釐不等直隸運河挖淺於天

津等州縣每畝幫銀一釐以上各款總於田畝正賦之外派令捐輸合計捐數共十萬餘兩而官吏之借端苛派必不止於此者正帑之所省有限官吏之中飽無窮若該部行文四省督撫即將該省捐輸各項於乾隆元年爲始一槩革除仍嚴飭所屬官吏無得行私徵派以爲民困其挑挖運河等項工程需用銀兩著該督撫覈實奏明於公項內酌撥動用報部覈銷○准內外未補實缺各官恩詔給封○吏部議准署湖廣總督邁柱等奏湖南永定九谿二衛經前任巡撫王國棟題請改爲安福縣第所徵屯糧疆界不清應請於永定衛添設一縣歸澧州轄其界內之慈利永順桃源桑植四縣攙雜田糧各就附近統歸方圖繪造圖冊送部從之定縣名曰永定○甲申諭審案不許株連婦女○曾靜張熙伏法○丙戌諭隆昇剛愎自用怙過不悛若仍留浙江於海塘無益著

解任來京其副都統織造二缺候朕另降諭旨程元章身爲巡撫不知和衷共濟乃懷挾私心貽誤公事亦不應留於浙省著解任來京其巡撫印務卽著大學士嵇曾筠兼管俾地方管轄與海塘工程歸併一手自無掣肘牽制之患張坦麟汪隆俱照司道例聽嵇曾筠節制委用江南總督趙宏恩駐紮江甯難以兼管河務江南總河員缺著高斌補授其管理兩淮鹽政候朕另降諭旨○命歸化城設駐防將軍副都統二員協理○己丑諭朝鮮國感戴我朝之恩虔修職貢甚爲恭敬凡大臣官員之差往彼國者向有餽送儀物之舊例朕以厚往薄來爲念若令使臣照例收受恐該國不免繁費若槩不收受又恐該國王以使臣遠涉缺餽贐之禮有歉於心著從此次詔使始凡餽送白金儀物等項悉按舊例裁減一半永著爲令該部卽行文該國王遵行○命追諡賢良祠入祀

諸臣○以王士俊署兵部侍郎

原任河東總督

○辛卯諭

皇祖妣仁皇

后外家俱蒙恩賜公爵惟

孝昭仁皇后外戚未曾加封二等公

訥親向蒙

皇考嘉獎以爲少年大臣中可以望其有成者今朕

卽位以來訥親行走勤慎實心供職著晉封一等公世襲以示推
錫恩榮之典○諭督撫之於屬員體統雖分尊卑均有辦理地方
事務之責屬員惟當實心供職不宜以趨走逢迎爲尙督撫亦宜
體恤屬員減其傳喚恕其末節俾得舒暇以理本任之事朕聞附
省之首府首縣不論有無要緊公務每日伺候督撫衙門侵晨而
往日午未歸率以爲常恬不知怪其督撫同城者撫傳未歸督傳
又至僕僕於道奔走不遑夫附省郡縣催科獄訟較他處更爲殷
繁卽令專心致志猶恐精神不逮乃似此竭蹶趨承必致廢弛本
任事務是以樞謁爲重而以職事爲輕矣朕更聞閩廣督撫司道

等官彼此宴會廢時失事屬員效尤此風至今未改諸凡積習甚非大吏之所以督率屬員與有司之所以恪恭厥職也嗣後各宜留心改易凡附省郡縣有司督撫非面商之事不得無故傳喚其離省各屬官尤不得輕離職守如有逢迎應酬作無益以害有益并啓貢緣弊竇者更玷官方朕必加以嚴譴○禁各鈔關例外苛取○壬辰纂修明史成○是歲朝鮮來貢

東華續錄

乾隆三

臣王先謙敬編

臣周嗣蕃恭校

乾隆元年丙辰春正月丁酉諭爲治之道在於休養生民而民之
所以休養在乎去其累民者使其心寬然自得以及各謀其生各安
其業而後富足可期此在親民之吏隨事體察惟恐毫末有累於
民而已朕思我皇考世宗憲皇帝誠求保赤有孚惠心蠲免額
徵寬減浮糧偶有水旱災祲卽行賑恤如救焚拯溺仁心仁政千
載莫並而民生猶不得寬裕者大率由督撫大臣不能承宣德意
而有司中刻覈居心昏庸寡識者或以苛察爲才能或受蒙蔽而
不覺以致累民之事往往而有也卽如催徵錢糧而差票之累數
倍於正額拘訊訟獄而株連之累數倍於本犯抽分關稅而落地

守口給票照票貧民之受累數倍於富商巨賈至查拏賭博黃銅
以及私宰私鹽之禁胥役營兵因緣爲奸佐貳雜職橫肆貪酷一
案而化爲數案一人而波及數人如此等者不可枚舉以此擾累
吾民無怪乎民多不得自安其生業而朝廷之德施終不能盡致
閭閻於康阜也嗣後各直省督撫所以董率屬員者務以休養吾
民爲本而一切擾累之事速宜屏除庶民生可遂而民氣以舒然
督撫之不善會朕旨者又恐因此而謂諸事可以不辦將轉成廢
弛之習不知寬大之與廢弛判然不同不顧民生事務紛更以矜
幹濟者外似振作而實則廢弛也勤恤民隱安靜悃悃以培元氣
者乃非廢弛而真能振作也其尙各體朕意○命柏修在刑部侍
郎上行走本任副都統○戊戌准漢軍兵丁與滿洲蒙古一體挑往莊
浪涼州駐防○己亥命易州旗營貯穀每歲春散秋還並令盛京

一體貯穀備荒○癸卯總理事務王大臣議覆直隸總督李衛奏請出蠶省分建先蠶壇臣等案爲壇以祀先蠶經傳未聞未便各省城通立應於京師建祠奉祀至期遣禮部堂官一員承祭從之○乙已經畧張廣泗奏苗疆獲勝情形得旨貴州逆苗侵擾內地從前辦事諸臣措置失宜歷時甚久毫無就緒朕是以特命張廣泗爲經畧專其事權俾得悉心辦理據奏見在分兵三路合力並進上游九股與雞溝首逆各寨分布弁兵四千餘名清江下游各逆寨分布弁兵五千餘名同時進剿三方首惡衆悍巢固爲各處逆苗所倚恃者俱已搗毀其附從黨羽皆知畏懾紛紛求請招安者不下數百寨等語張廣泗辦理苗疆軍務以來一切調度俱合機宜其在事官弁兵丁奮勇戮力甚屬可嘉著詳記檔案俟事竣之日分別議敘具奏又奏黔省軍需銀張照任意糜費今支用將

完軍需未竣請撥銀八十萬兩來黔接濟得旨從前張照辦理苗疆事務將撥解黔省軍需銀一百萬兩收貯貴東道庫總不令本省藩司與聞及元展成因軍需緊急司庫無項可支咨明張照促其協濟乃張照覆稱與伊全無干涉並不理論身爲總理而公然膜視如此誠不知其是何肺腸及其動用錢糧又復錯雜舛謬如運送軍糧並不按程途里數以致夫役任意延挨所運米數遞減而運費日增徒滋糜費其採買馬匹則將草料銀兩俱給馬夫承領以致馬匹倒斃疲瘁者甚多種種任意乖張甚屬可惡今據張廣泗參奏前來著該部查明前項糜費應賠錢糧勒限嚴追在張照名下賠還十分之二又據張廣泗奏稱見在軍需未竣請撥銀八十萬兩來黔接濟等語著戶部卽撥銀一百萬兩交與張廣泗料理動用○丙午署甯遠大將軍查郎阿等奏巴里坤大兵撤後

請仍於哈密地方駐兵五千大兵出征數年不便再行留駐應於甘涼西肅安西各提鎮兵內派出更換布隆吉赤靖等處應分駐五千於內地標營兵內輪班派往安西鎮營向有分防汛守加以肅州甘涼原設戰兵及分駐涼莊滿兵以之接應口外兵力已屬寬裕原不在安西防兵之多寡俟數年後邊界大定或應量減則將布隆吉赤靖等處防兵陸續議撤哈密距安西甚遠不可無重兵彈壓此五千兵應永遠分駐以靖邊徼下總理事務王大臣議行○準噶爾噶爾丹策零遣使奉表貢方物○丁未諭河東總河嗣後修築河南孟縣小金隄動支公項毋派民捐○己酉總理事務王大臣議覆御史蔣炳奏請升契神主於崇聖祠中與五王並祀查契爲明倫敷教之始應入祀典惟契爲有商之始祖於孔子有君臣之分祖孫之派其請升主於崇聖祠恐有未安請敕

部詳議具奏尋奏自商以後契祀無徵蓋契爲有商配天之祖未
便以從祀 帝王廟而列於兩廡於上世有敷教之功其祀典不
便亞於 孔廟世遠年湮教澤不似孔子之親亦不便埒於 孔
廟契未與祀前人實有深意律以諸侯不敢祖天子大夫不敢祖
諸侯之義孔子雖嘗自謂殷人斷不敢以有商配天之祖爲始祖
又不便升契於 崇聖祠祀典固宜於備禮制亦求其合遷就附
會於典禮反有未協應無庸議從之○壬子賜準噶爾使臣吹納
木喀入覲諭曰去歲守邊大臣奏爾等已至朕甚忻悅非特爲爾
準噶爾求和之故思仰副我 皇考闡揚黃教休息生靈之意也
今閱噶爾丹策零表文並不遵 皇考諭旨定界漫指前奏未允
之哲爾格西喇呼魯蘇等處爲爾部邊界欲於喀爾喀境內更留
空間之地是誠何言又云旣經和好不必分界我大國視準噶爾

之和不和定界與否原無關體要但定界之事起於伊父策旺阿
拉布坦奏請其初意止欲得阿爾台山外哈道里哈達清吉勒布
拉清吉勒等處而已 皇考尙不允其請後因撤兵息民竟以其
地賜之以克木齊克汗騰格里循阿爾台山梁下索勒畢嶺至哈
卜塔克拜塔克之中過烏蘭烏蘇至噶斯口爲界又允伊父所請
呼遜托輝至喀喇巴爾楚克作中間閒地今爾等至京請和若不
議定疆界何以爲信且能保邊境小人異日不起爭端乎若噶爾
丹策零但求喀爾喀無踰哲爾格西喇呼魯蘇尙可俯允不然朕
遣使何爲爾等至此亦何爲朕知噶爾丹策零本無求和之意特
借此牽率奏請希圖通市之利耳所見如此能不爲朕所恥笑若
能遵 皇考諭旨定界朕必格外施恩所得不更多乎我 皇考
惟以闡揚黃教休息生靈爲心朕深體 皇考之心興教安民而

外初無用兵之意縱爾部欲激發朕怒亦斷不勤兵於遠也朕不
但欲令我內部喀爾喀各安其生視爾準噶爾部人亦如我赤子
業已議定撤兵止少量留守邊此爾等所共知朕欲天下之民
舉安卽守邊之事亦與和不無涉也噶爾丹策零嗣後能體
皇考與朕之心則遣使來不然各保其境可也儻更不自揣量犯
我邊境朕自有辦理之道以天朝之威靈兵臨爾部尙不獲全利
爾準噶爾螳臂之力勞師涉遠豈能有濟爾還其明告噶爾丹策
零令更熟思審處定議具奏吹納木喀奏稱 大皇帝諭旨當謹
記歸告噶爾丹策零其所陳奏實遵 成佛大皇帝旨意欲振興
黃教安逸眾生所以輸誠上請非敢借遣使以圖通市又諭噶爾
丹策零如無此意甚善興教安民乃 皇考與朕之事非噶爾丹
策零之任也縱彼實力行之止及準噶爾一小部落耳俾天下萬

國蒙被床澤其事自在朕躬且爾言實遵 成佛大皇帝旨今日

噶爾丹策零之奏與前次 皇考諭旨合乎否乎果欲定議當就

事諭事何得牽引遠年噶爾丹之事如此瀆陳往復真無了期矣

爾等不過奉使之人成則與有榮施不成則空勞往返定界之事

誠非爾等所得擅議朕當另遣大臣前往爾起程時有敕書付爾

噶爾丹策零能體朕意謹遵 皇考原旨定界可再遣使來不然

亦無庸復遣其遣使當仍遣爾來至我邊界時可告我守邊大臣

噶爾丹策零表文內有遵旨定界之語方許入境如無此語決不

許入也聞爾等仍攜貨來不忍復令攜歸可留住數日貿易事畢

起程可也○癸丑西北兩路大兵凱撤酌留鄂爾坤及烏里雅蘇

臺駐防兵丁召大將軍慶復回京派參贊大臣二員協同策凌辦

事○召劉章來京以徐士林爲河南布政使

由福建汀漳道遷

○乙卯諭

私鹽之禁所以除蠹課害民之弊大夥私梟每爲盜賊通藪務宜嚴加緝究然恐其展轉株連故律載私鹽事發止理人鹽並獲其餘獲人不獲鹽獲鹽不獲人者槩勿追坐至於失業窮黎肩挑背負易米度口不過四十斤者本不在查禁之內蓋於裕商足課之中而卽以寓除奸愛民之道德意如是其周也乃近見地方官辦理私鹽案件每不問人鹽會否並獲亦不問販鹽人數多寡一經捕役汛兵指拏輒根追嚴究以至挾怨誣扳畏刑逼認干累多人至於官捕業已繁多而商人又添私雇之鹽捕水路又添巡鹽之船隻州縣毘連之界四路密布此種無賴之徒藐法生事何所不爲凡遇奸商夾帶大梟私販公然受賄縱放而窮民擔負無幾輒行拘執或鄉民市買食鹽一二十斤者並以售私拏獲有司卽具文通詳照擬杖徒又因此互相扳染牽連貽害此弊直省皆然而

江浙尤甚朕深爲憫惻著直省督撫嚴飭各府州縣文武官弁督率差捕實拏奸商大梟勿令疏縱其有愚民販私鹽四十斤以上被獲者照例速結不得拖累平人至貧窮老少男婦挑負四十斤以下者槩不許禁捕所有商人私雇鹽捕及巡鹽船隻幫捕汛兵俱嚴查停止毋得滋擾地方俾良善窮民得以安堵○丙辰諭西北兩路用兵以來一應軍需皆取給於公帑不肯絲毫累民而費用繁多不得不資藉捐納以補國用之不足此中外所共知者當日皇考聖意原欲俟軍需告竣卽行停止今大兵漸撤軍需減省著將京師及各省見開捐納事例一槩停止夫議捐納者未嘗不出於士子之口而留生童捐納一款是士子首以捐貲爲進身之始矣其應停應留之處著漢九卿翰詹科道會同確議具奏尋議生童捐監係士子一進取之路順天鄉試例有南北監生定爲

皿字號中式且游學隨宦在京者亦得藉爲應試之階應留戶部捐監一條各省一槩停止不令照前考職並請以每歲捐納之銀留爲各省一時歲歉賑濟之用從之○諭教職乃師儒之官有督課士子之責蒙 皇考世宗憲皇帝加恩優待屢次訓勉與有司一體賞給封典朕卽位以來念伊等官秩卑微恐以冗散自居不思殫心盡職特加品級以鼓勵之查舊例教職兩官同食一俸未免不敷養廉著從乾隆元年春季始照各員品級給與全俸永著爲例○命乾隆元年二月鄉試迴避試卷另行考試取中○高其倬因病解任以顧琮署江蘇巡撫由清運總督署○丁巳召張廷枚來京以王仕任署福建布政使由鹽驛道署召袁承寵來京以喬學尹署湖北按察使原任福建按察使○己未署湖南永州鎮總兵崔起潛疏劾鄂爾泰張廣泗中外欺蔽迎合 上曰苗疆一事關係重大 皇考

當日卽命朕會同王大臣辦理情形原委尤所熟悉比來張廣泗之經畧哈元生之暫留領兵董芳元展成張照之革職拏問皆朕特降諭旨大學士鄂爾泰未嘗贊一詞此廷臣所共知者崔起潛捏詞妄奏著卽革職解部審擬具奏○庚申 上啟鑾謁 陵○

癸亥

上謁

昭西陵

孝陵

孝東陵

景陵回鑾○

是月經

畧

張廣泗奏分剿新疆首逆各寨俱已搗毀各請招安俟辦理妥協卽進攻高坡一帶分兵部署大小丹江並八寨山苗等處得旨黔省逆苗不法擾害地方自上年四月以來用兵征剿以蕞爾蠡苗而合五省之兵力厯七八月之久尙未甯帖此皆從前張照等乖張錯謬之所致朕以卿熟悉苗疆情形且從前係自家辦理之事是以卽位之初卽將張照撤回命卿更換旋即授爲經畧今據奏征剿情形較前已有頭緒是以明降諭旨特加褒獎以鼓士氣

且使中外咸知苗疆漸次就理也但朕細閱情形首惡逆寨雖經攻克而其餘附逆尙多又八寨尙復告警黃平內地猶有餘孽且調川兵三千名之多則剿撫之事不但未有十之六七且未及十之四五也此時正當慎重籌畫勦力同心以期早奏膚功斷不可因畧有頭緒侈然自足又不可苟且塞責以圖了事從前張照元展成輩或有掣肘之處今伊等皆擊解回京哈元生又受卿節制權旣歸一時日亦不爲不久卿更何所諉乎若今年四五月間尙無成效朕則惟卿是問至於請兵請餉一如卿奏諭部速行矣朕以苗疆關繫甚大因見張照不能勝任是以卽位第二日卽簡命卿往卿若不能早奏膚功永成安定則朕恩恩辦理爲可笑之舉矣卿當爲朕全用人之顏面倍加勉勵朕此諭非督催卿苟且了事而已也向來封疆大吏奉一褒嘉之旨則欣幸自滿奉一申飭

之旨則倉皇失措此豈公忠體國大臣之所爲夫大臣惟當以國
事爲重不爲目前之謀爲遠大可久之計俾地方甯謐百姓乂安
方爲不負倚任朕知卿固無所觀望但君臣交勉有不得不然者
卿卽體朕相期之意以滿朕望可耳又奏調集外省官兵擬於四
五月間新疆定局之後酌量撤回得旨朕原命卿斟酌非強令撤
兵也萬里之間遙制軍機可乎一以委卿矣所云爲君之難非身
歷其地者必不知之卽如逆苗一事從前 皇考曾命朕兄弟與
聞見數省摺奏皆係觀望意旨委曲迎合從未見以實心奏對者
卽朕今日非不日念苗疆也若朝下一令焉爲苗疆暮下一令焉
爲苗疆則汝等大吏不知所適從矣然恐號令之繁而欲省其言
詞則又將觀望以爲皇上之意不在苗疆也卽此一事之爲難而
他事可以類推此意非指卿亦不過幾暇之筆耳

二月丙寅

上還京師

○諭任土作貢國有常經無論士民均應

輸納至於一切雜色差徭則紳衿例應優免乃各省奉行不善竟

有令生員充當總甲圖差之類者殊非國家優恤士子之意嗣後

舉貢生員等著槩行免派雜差俾得專心肄業儻於本戶之外別

將族人借名濫免仍將本生按律治罪○詔山東巡撫修理少昊

陵帝堯廟及周公顏子曾子孟子等廟○令內務府三旗照滿洲

蒙古漢軍例各立米局備糶○總理事務王大臣議覆僉都御史

李微奏請訂孝經入四子書進程子顥入大成殿二條據稱聖

言稱經自孝經始諸經以此稱經等語謹按經解名篇著於禮記

離經辨志載於曲禮則經名早見孝經稱天之經地之義乃舉經

常之道而言安得以擬議之辭指爲定名之義又稱古文孝經劉

炫僞作朱子亦未深考吳澄據許慎說文始爲考證等語謹按孔

安國古文孝經獻之祕府者未及施行許慎亦未得見劉炫僞作詳於隋書辨於唐會要見於陸德明釋文先儒早知其非不待吳澄之辨安得謂朱子亦未深考又稱孝經以前六章爲根柢中三章爲體要後九章爲會通三者人數六者地數九者天數合爲十八章等語謹按孝經第一章乃全部綱領自天子以至於庶人皆以孝爲本次孝治次聖治歸於紀孝行反是則有五刑推此則爲至德要道道有經權常變皆可通於神明而復申言事君結以喪親則孝道純備而宗義開明俱從第一章脈絡貫注天地人本一理固於數無涉且數於孝經何涉李徼強分之數又於天地人何涉至請以孝經同學庸訂爲一冊自乾隆元年爲始遇鄉會試與學庸一體命題等語謹按四子之書乃朱子所自訂刊於臨漳宋理宗頒行學宮至元明以及我朝遵行已久大學中庸程子從禮

記摘出朱子訂入四書孝經單行篇章無多何可與四書並列朱子爲孝經刊誤疑其非盡聖人之言說得都不親切吳澄亦曰今文亦不無可疑疑其所可疑信其所可信去其所可去存其所可存朱子意也制科取士第一場首試四書文三篇二場用孝經論一篇與性理互出所以尊崇聖經總期發明經義文與論何擇李徽欲請訂入四書將使天下後世謂四書訂於朱子五書訂於李徽殊不自量之甚朱子熹羽翼經傳闡發義蘊蒼萃羣言衷於至當四書集註章句親切詳明使學者涵泳紬繹具見聖賢立言精意我聖祖仁皇帝特進朱子熹入配大成殿所以爲天下萬世學者樹之標準俾知所趨向非以朱子熹爲賢於周程諸儒也如李徽所言程子顥亦宜入大成殿周子敦頤以下均可以次詳酌則周子敦頤二程子頤張子載邵子雍皆宜附於十哲之列

孔子及門如南容有若子賤諸賢不亞於程周諸子並不亞於十哲亦未盡入 大成殿踵事日增將貽後議揆諸尊崇至聖以師表萬世之至意亦豈有當至性善之說詳於孟子皆淵源之論李徽以人性之善爲支派謂程子顛解繼之者善亦人性之支派指此爲有功性旨是不獨有悖孟子亦大非程子之意敷陳舛謬學術攸關誠恐無知效尤或詆毀先賢或穿鑿經義或託名理學自便其私大爲世道人心之害請嚴申飭得旨這所奏是著交該部頒發天下學政咸使遵行○己巳甘肅甘州涼州等府雍正十二年歉收且有牛疫該督撫未經奏報 上降旨切責議賑○封理密親王允初之子弘曉孫永璥爲輔國公○命考試八旗廢員精於國語者充八旗滿洲教習○以補熙署漕運總督由松江提督署○召七克新來京調奚德慎爲盛京工部侍郎由工部右侍郎調○庚午免

宣化府門稅以口鹽歸張家口徵收○壬申詔直省生員監生年七十以上者優免一丁八十以上者給與八品頂帶○封莊親王允祿之子弘普爲貝子○癸酉諭治道貴乎得中矯枉不可過正前屢降諭旨訓迪廷臣見八旗辦事情形及諸臣條奏事件尙有未合大公至正者如八旗事務頭緒繁多章程不一朕是以畧加斟酌去其繁冗俾從簡易而都統副都統等竟於會議之時多不到班更有乾清門奏事亦不到者且有交辦事件遲至一年半而後議奏者有朕面詢所奏之事情節而茫然不能應對者如此則日漸廢弛鮮能振作豈朕料理旗務之本意乎又如諸臣條陳關稅者甚多而皆未得其樞要夫鈔關之弊如額外巧取違例橫徵奸胥猾吏多般需索自當嚴行禁止違者重治其罪故鄉村落地稅苛累細民已經特諭革除若將關稅正項槩行議減不過官

吏中飽上有損於國課而下無益於商民乃事理之顯然可見者
又如有請除學校煩苛之弊欲更成例者在國家養育人才士子
原當優恤儻學臣等約束規條過於嚴厲俾多士有束縛之苦而
無優游之樂固不可行若一味寬縱不繩以禮法則蕩檢踰閑如
前明之紳衿武斷鄉曲凌虐庶民貽害於風俗人心而本身亦罹
法網豈國家優待士人之道乎其他矯枉過正與此相類者不一
而足是皆徇於一偏而不知其流弊者也大抵 皇祖聖祖仁皇
帝之時久道化成與民休息而臣下奉行不善多有寬縱之弊
皇考世宗憲皇帝整頓積習仁育而兼義正臣下奉行不善又多
有嚴刻之弊朕繼承統緒繼述謨烈惟日孜孜止欲明作有功以
幾惇大成裕之治近覘諸臣奉行漸有錯會朕旨而趨於怠弛之
意朕滋懼焉天下之事有一利必有一害凡人之情有所矯必有

所偏是以中道最難先儒謂子莫所執乃楊墨之中非義理之中也必如古聖帝明王隨時隨事以義理爲權衡而得其中乃可以類萬物之情成天下之務故寬非縱弛之謂嚴非刻薄之謂朕惡刻薄之有害於民生亦惡縱弛之有妨於國事爾諸臣尙其深自省察交相勸勉屏絕揣摩迎合之私心庶幾無曠厥職而實有補於政教戒之慎之○甲戌賞江南佐雜官養廉○敕陝西停禁商販俾晉屬民食有資○遣準噶爾來使吹納木喀起程召入乾清宮諭曰此次爾等來時朕未曾派出大員與爾等議定疆界者非朕不受爾等請和意欲興戎也以爾台吉噶爾丹策零未能遵奉皇考諭旨酌定疆界且又假詞陳請朕雖派員定議亦屬無益况疆界一事爾等豈可專主是以未經定議將諭旨命爾等齎回噶爾丹策零又奏請遣使先是 皇考軫念黃教眾生曾經遣使

爾等並未遵奉定界今朕遣使何益噶爾丹策零誠能遵奉皇
考諭旨酌定疆界具奏卽一言足以蔽事不然雖往返遣使何爲
且定界之事不過從爾所請於我天朝無涉朕仰體皇考聖心
闡揚黃教安養眾生斷無與爾興戎用兵之事今將官兵撤回各
歸本處惟稍留弁兵以衛疆國想爾等亦有所聞此等守衛疆圉
之兵無論與爾和好與否防守地方在所必設朕爲大君旣經降
旨斷無復改之理諭旨內俱經備載噶爾丹策零接奉此旨誠能
遵奉皇考諭旨留意黃教眾生酌定疆界遣使具奏抑或遵照
諭旨指示止以喀爾喀游牧不過哲爾格西喇呼魯蘇一事爲請
亦屬可行朕自降旨指示爾使臣惟思玉成此事始屬有益亦不
致徒勞往返朕兩次所降諭旨爾須謹記俟去時諭噶爾丹策零
當思久遠之策勿顧目前小利噶爾丹策零係一部落爲首台吉

豈不知此且爾等激朕興師不過希圖小利耳今不出師止守內地邊疆爾等何利之有總之和則於爾有利否則於爾無利此皆事之顯然者將此曉諭噶爾丹策零一切利害詳細酌定○以晏斯盛爲安徽布政使由鴻臚寺○丁丑諭朕聞河南武陟縣木藥店沁河隄工關繫民居廬舍每年派農夫修築以防水患里民按畝派錢約計二千四百餘兩頗爲地方之累若設立長夫二十名歲支工食三百六十兩卽可省民間二千餘金之幫貼著該部傳諭河南總河白鍾山照此辦理其設立長夫每年應領工食卽動豫省存公銀兩給發不得絲毫累民永著爲例儻胥吏土棍等仍有借名科派者交與該管官嚴查從重治罪○以士子入闈遇雨各賜銀三兩○命福建額徵屯糧歸州縣徵收○己卯賜準噶爾台吉噶爾丹策零敕書曰噶爾丹策零朕續承大統繼述 皇考

世宗憲皇帝之志無分中外一視同仁以振興黃教安養眾生爲務今爾遣吹納木喀來奏稱阿爾台本我游牧之地杭愛乃喀爾喀游牧之地旣經和好此疆彼界原不必條分縷析今因遵旨定界故敢奏聞又稱諭旨所示哲爾格西喇呼魯蘇等處雖已指明我部疆界尙未定喀爾喀游牧之界故未敢定議祈再稍展空地遣使來此酌定令喀爾喀與我部邊界彼此闊遠伏乞允行按定界之事本起於爾父策旺阿喇布坦奏請乞以阿爾台山外哈道里哈達清吉勒布拉清吉勒兩隅賜爾初尙未蒙 俞允其後 皇考一意休兵息民方可其請令以克木齊克汗騰格里循阿爾台山梁下索勒畢嶺由哈卜塔克拜塔克之中過烏蘭烏蘇至噶斯口爲界爾父又請以呼遜托輝至喀喇巴爾楚克爲居中間地毋與喀爾喀游牧偪近致彼此猜疑 皇考降旨此事亦屬可行

今爾誠恪遵我 皇考聖訓奏請則我原設卡倫不必動移但令喀爾喀游牧稍稍內徙朕自當體 皇考興教安民之意降旨俯允爾乃並不遵我 皇考之訓竟欲以哲爾格西喇呼魯蘇爲爾邊界專令喀爾喀內徙別留中間闊遠之地牽率奏請明係託故枝梧如此則朕更遣使何爲朕爲萬方共主當使羣生皆得其所不但軫恤內地蒙古卽爾準部亦在我撫綏之內仰承 皇考仁育萬物之心以息兵端業已降旨撤兵豈復更張爾若不恤爾部起釁殃民勞爾部眾擾我邊疆則朕亦無如之何矣爾台吉其圖及久遠將一切利害得失之故再四思維詳悉定議一遵 皇考諭旨則遣使來奏否則不必更遣使矣特降敕諭付爾來使齎還隨敕賜各色段俱十端○庚辰諭朕自繼序以來勤思治理廣開言路俾大小臣工皆得密封摺奏蓋深慮民隱或壅庶事失理故

公聽並觀以求濟於實用諸臣必宅心虛公見理明徹慮事周詳
各抒忠悃實有切於國政民依官方吏弊然後可以佐朕不逮故
凡言有裨益立見施行而邇來諸臣所奏或不能適合厥中徒有
陳奏之名而不計及實有裨於政治與否或瑣屑而昧於大體或
空言而無補於國事非朕求言之本意也故前降諭旨諄諄訓迪
其中尤可詫怪者謝濟世請用其自註學庸易朱子章句頒行天
下獨不自揣己與朱子分量相隔如雲泥而肆口詆毀狂悖已極
且謂明代以同鄉同姓尊崇朱子之書則直如焚下老婢陳說古
事雖鄉里小兒亦將聞而失笑也李徽欲以孝經與四書並列爲
五立義支離屬辭鄙淺於宋元大儒所論孝經源流離合曾未寓
目卽欲變亂歷代論定列於學宮數百年不易之舊章亦不自量
之甚矣至於在任守制事本不可常行考之禮記諸侯旣葬王政

入於國大夫士既葬公政入於家故戴德喪服變除言古者歷降之服其居處飲食哭泣思慕一如其常期蓋禮有以權而制者苟能自盡居喪之實心亦可無憾也今溥海奏請勒令從前在任守制者雖喪期既滿仍令解任追服朕令羣臣守制者原以行於將來非以論其已往且時過事遠而勒令衰經三年於傳所謂喪事卽遠之義亦未有當至配享孔廟千秋禮教所關典至鉅也兩漢傳經之儒久升孔廡後代復議絀之者且數數然也陳世倌乃連舉數人無乃輕率至若準噶爾侵擾藩屬部落我聖祖爲邊疆久遠之計設兵彈壓本非有耀武窮荒之意皇考念我軍屯戍日久彼國亦甚困弊故遣使宣諭減撤戍兵休養士馬皆因時制宜以撫綏中外陳世倌請修方畧意涉違迎如謂調兵籌餉之屬可爲後式則各部具有冊籍何用別爲一書凡此類皆無當於

實用而有關於國體夫此數人者皆輿論所推服爲讀書人而久
不見用者也今朕拔而用之而數人之識見若此陳奏若此豈不
有愧於士林之清議與朕特擢之恩乎朕若因其妄行瀆奏交部
議處不爲無名但朕志切求言諸臣言雖不當不惟從寬免其譴
訶亦並不介意然不得明白訓示者恐無知之徒爭相效尤肆
言無忌天下無識者之聽聞志慮未免爲所惑亂則所關於世道
人心者非淺鮮故使言者自省而聞者知戒各務竭忠效誠指事
當物以副朕諄切求言之本意○諭朕聞江南淮安府屬之桃源
縣徐州府屬之宿遷縣睢甯縣濱臨黃河沿河地畝淹涸靡常雍
正五年因朱家口潰決之水復循故道其舊淹田地始得涸出而
河臣爲地棍所欺遂以此地爲新淤之腴產睢甯縣報升地五千
三十九頃宿遷縣報升地四千七十二頃桃源縣報升地三千八

百四十二頃嗣蒙 皇考世宗憲皇帝勤求民隱特頒諭旨以淤地勘報不實令河臣會同督臣委員查勘共豁地七千二百餘頃萬民感頌所有存留地五千七百餘頃俱照各縣成例折算實地三千五百餘頃科則亦經減輕其潼安一衛裁汰改歸州縣徵收乃比年以來應納錢糧仍催徵不前蓋此淤出之地畝卽舊有之糧田是以民力維艱輸將不繼也朕以愛養百姓爲心旣洞悉其中情事自當加恩開除以紓民力著將宿遷睢甯桃源三縣見存新淤涸復改科地糧額徵銀六千五百四兩全行豁免其雍正十三年淤地未完錢糧亦免徵收至水沈地畝仍照例歸於每年冬勘該部卽遵諭行○命喀爾喀每歲選兵三千屯駐鄂爾坤防秋又命扎薩克圖汗格勒克雅木丕勒等於扎卜堪台西里等處仍設內卡座蒙古游牧無過察罕和羅等處○加楊名時禮部尙書

銜兼管國子監祭酒事

原任吏部尚書

○辛巳諭翰林以讀書爲職業然

讀書將以致用非徒誦習其文辭也古來制誥多出詞臣之手必學問淹雅識見明通始稱華國之選有裨於政事今翰詹官員甚多於詩賦外亦當留心詔敕掌院學士以下編檢以上可各以己意擬寫上諭一道陸續封呈朕覽旣可以覘其文藝之淺深並可以觀其胸中之蘊蓄儻有切於吏治民生者朕亦卽頒發見諸施行則詞曹非徒章句之虛文而國家亦收文章之實用矣嗣後庶吉士散館後卽照此例行○癸未諭翰林撰擬王貝勒貝子冊文如朕叔朕兄等皆呼爲爾某於朕敬長之意未符此心有所不安凡遇叔兄等皆當稱叔稱兄自弟姪以下則用爾字永著爲例○令宗人府查諸伯叔之子孫年未及封者挑在侍衛章京上行走

○召吳騫來京以黃叔琳爲山東按察使

原任浙江巡撫

○甲申諭兩浙

鹽務向來廢弛自李衛爲浙江總督以來留心整理諸事妥協及
李衛離浙程元章接任其性辦事迂懦鹽政漸不如前是以皇
考諭令布政使張若震暫行兼管前據張若震奏稱藩司之職經
管通省錢糧頭緒繁多難以兼顧鹽務且緝私全賴官弁協力未
免呼應不靈恐誤公事等語張若震准解鹽政之任俾得專心於
職守大學士嵇曾筠見爲浙江巡撫著照從前李衛之例改爲浙
江總督兼管兩浙鹽政其管轄地方節制官弁等事悉照李衛前
例行嵇曾筠旣爲浙江總督郝玉麟著以閩浙總督銜專管福建
事務朕聞浙省濱海之地向來鹽價每斤不過數文今加一倍且
有不止一倍者小民甚爲不便其如何先賤今昂之故大學士嵇
曾筠可細心體察多方調劑使之平減俾商民均受其益又聞官
弁兵役捕緝私鹽之時每遇大梟不敢過問往往縱之使去至於

肩挑背負之窮民資以餬口者則指爲私販重加懲處種種弊端不可悉數前降諭旨甚明尤當加意稽查實心辦理以除弊竇○免河南祥符等四州縣雍正十二年民欠○乙酉以二格爲兵部右侍郎

由左副都御史遷

○丁亥命候考博學鴻詞人員每名月給膏火

銀四兩○戊子尊 世宗憲皇帝陵曰 泰陵○己丑諭朕前以

應付僧火居道士竊二氏之名無修持之實甚且作奸犯科難於稽查約束故酌復度牒之法使有志修行者永守清規而無賴之徒不得竄入其中以爲佛老之玷其情願還俗者量給貲產其餘歸公留爲養濟之用此亦專爲應付僧火居道士而言也名山古刹閉戶清修者在所不問前降諭旨甚明見交與王大臣九卿會議乃聞外省傳述錯誤一切僧道皆有惶惑不安之意恐將貲產歸公遂爾弊端百出有將己身田宅詭寄他人戶下希圖藏匿者

有謀屬書吏分立花戶詭名以多報少者有減價速求售賣變銀入囊者且有局外匪類從中借名索詐者夫此等僧道既謀利戀財如是揆之仙佛之法乃糠粃稂莠也卽收其私囊歸公以養濟窮民亦何不可之有天下後世自有公論但朕之本意原以天地好生之心爲心一物不得其所如己推而納之溝中此庸愚無知之僧道亦天下之一物耳朕何忍視同膜外况朕先所降旨甚明原以護持僧道而非有意苛刻僧道今觀伊等情形是愚昧無知被人恐嚇而不知原降之諭旨也著該部先行曉諭去其迷惑至於應付僧火居道士之貲產因無所歸著是以有養濟窮民之說究竟國家養濟窮民豈需此區區之財物亦可不必稽查歸公此處著另議具奏○諭各直省督撫無越次保題○達賴喇嘛遣使貢方物優賚之○辛卯以程元章爲漕運總督○以杭奕祿爲額

外內閣學士

原任禮部侍郎

○壬辰諭貴州軍營員弁著照西北兩路軍

營例自副將以下准張廣泗酌量題補

○准滿洲蒙古舉人補內

閣中書

○河南巡撫富德奏參前任督臣王士俊報墾多罔捐輸

累民得旨富德前因豫省開墾一事辦理不妥民多怨言是以朕

令王士俊解任來京於稠人之中特簡用爾爲巡撫以繼其後實

望汝竭力殫心秉公據實除從前之弊端收後來之利益俾豫民

永永受福也今覽汝奏第一摺內則稱王士俊虛報開荒種種欺

罔而第二摺內又稱豫省地畝隱匿者甚多除十二三兩年首

報之外猶有欺隱與其恩施於查隱既明之後不若恩施於查隱

未明之前可否特降諭旨槩行豁免等語是汝同時兩奏而自相

矛盾如是朕竟不解汝意之所在也夫無田有糧固爲民累而有

田無糧亦豈國體汝果能公平寬厚辦理妥協自有以服百姓之

心爲地方久遠之計今乃束手無策不能辨其爲熟爲荒應留應去而巧爲陳奏欲朕下一諭而免汝之查察以圖苟且了事人臣以忠誠事君者固如是乎且果係實在欺隱王士俊已經查出者朕方當獎賞王士俊以爲汝等無能庸碌督撫之勸舉而委棄之可乎所謂公平之政非汝等婦寺之仁砒砒之才所能勉強也夫無才尙可無才而加之以詐將何底止此事汝不能辦理又兼胸有成見無怪乎措置失宜敷陳巧僞也爲今之計可將老荒及鹽鹺河灘之地確無可疑者悉行開除以慰民望至於夾荒田地界在疑似者從容查訪不必急遽卽欲定局俟布政使徐士林到任時汝與伊熟商經理之或不至於大誤至豫省勸輸銀兩旣屬勉強可停其催交○雲貴總督尹繼善奏官兵攻克空稗台雄等寨經略張廣泗奏攻克大小丹江暨高坡山苗等處均得旨嘉獎

三月乙未朔諭朕聞浙江紹興府屬山陰會稽蕭山餘姚上虞五縣有沿江沿海隄岸工程向係附近里民按照田畝派費修築而地棍衙役於中包攬分肥用少報多甚爲民累嗣經督臣李衛檄行府縣定議每畝捐錢二文至五文不等合計五縣共捐錢二千九百六十餘千計值銀三千餘兩民累較前減輕而胥吏等仍不免有借端苛索之事朕以愛養百姓爲心欲使閭閻毫無科擾著將按畝派錢之例卽行停止其隄岸工程遇有應修段落著地方大員委員確估於存公項內動支銀兩興修報部覈銷永著爲例○丙申增設阿拉善山下滿洲牧廠○戊戌諭陝西甘肅二省民人屢年轉運軍需朕親批諭旨令許容寬裕料理勿使災民稍有失所乃許容不但無痼瘵乃身之意並朕旨亦不祇遵似此膜視民艱何以稱撫綏之職許容著解任來京巡撫員缺著劉於義署

理○庚子赦汪景祺查嗣庭兄弟族屬同籍○辛丑諭朕聞滇省鹽價昂貴每百斤自二兩四五錢起竟有賣至四兩以上者邊地百姓物力艱難僻壤夷民更爲窮苦每因鹽價太貴有終年茹淡之事朕心深爲軫念查該省鹽課除正項外有增添贏餘以備地方公事之用朕思贏餘之名原係出於民食充裕之後若民食不充自無仍取贏餘之理著總督尹繼善悉心妥辦將贏餘一項卽行裁汰務令鹽價平減縱使昂貴亦止可在三兩以下若裁去贏餘之後公用有不敷處可另行酌議請旨○壬寅諭朕聞奸宄不鋤不可以安良善風俗不正不可以興教化閭閻之大惡有四一曰盜賊三代聖王所不待教而誅者也二曰賭博干犯功令貽害父兄以視周官之罷民未麗於法而繫諸嘉石收之園土者罪有甚矣三曰打架卽周公所謂亂民孟子所謂賊民也四曰娼妓則

自周以前人類中未嘗有此此四惡者劫人之財戕人之命傷人之肢體破人之家敗人之德爲善良之害者莫大於此是以我皇考愛民之深憂民之切嚴申糾禁戒飭守土之官法在必行日夜捕緝積歲月之久然後道路少響馬及老瓜賊而商旅以甯賭博及造賭具者漸次改業而家室以安聚黨打架者斂迹而城市鄉鎮鮮聞鬪鬪娼妓遠藏不敢淹留於客店此 皇考十有三年政教精神所貫注而海內臣民顯見其功效實享其樂利者也朕自嗣位以來蠲免租賦豁除賠累裁革積弊增廣赦條無非惠保良民使得從容休息衣食滋殖而無識諸臣誣謂朕一切寬容不事稽察以致大小官吏日就縱弛民間謠言諸禁已開風聞直省四惡皆微露其端倪卽如天津一帶私鹽橫行無忌恐其他類此者相繼而起是守土之官敢悖 世宗憲皇帝之明旨墮十有三

年之成功而戕賊善良傷敗風俗也自後州縣官有政令廢弛使
四惡復行於境內者該督撫不時訪察卽行嚴參督撫司道郡守
有不能董率州縣殫心捕治者或被內外臣工覈實列奏或朕訪
聞得知必以溺職治罪與通苞苴受賄賂者等決不輕貸爾諸臣
慎毋泄泄沓沓自取殃咎戒之○癸卯諭朕聞直省州縣地
方額徵地丁錢糧項下有起解存留二款官役俸工卽在存留款
內支給若該省有地畝荒蕪糧額豁除者卽將官役俸工扣減以
抵豁除之數名曰扣荒此亦不得已之辦理也但此扣荒一項自
應合省大小官員均攤方不悖於情理乃聞外省止扣知府以下
及州縣佐雜教職寒苦之員而督撫司道轉不在扣除之內此則
大非情理矣著該部通行傳諭各直省督撫若該省有荒缺銀兩
應於督撫司道大員及府縣正印官俸工內酌量均攤扣除以抵

所缺之數至於佐雜教職等官俸工槩免扣除俾微末官吏得以養贍若有因地方荒缺而裁減祭祀銀兩者著遵雍正十一年

皇考世宗憲皇帝恩旨於該省存公銀兩內撥補以重祀典俱著各省督撫悉心妥議辦理○諭向來廣西鹽引因商人無力承辦以致民間有淡食之苦於雍正元年督臣孔毓珣題請官運官銷借動庫銀爲鹽本赴廣東納價配鹽分給各州縣照部定價值發賣行之二年已有贏餘遂將通省鹽價照部定之數每斤減價二釐發賣百姓稱便雍正五年又經孔毓珣奏稱粵西鹽斤自官運官銷以來已無鹽缺價貴之虞應請仍照部定原價一體銷售不必裁減二釐部議准行至今因之朕思食鹽乃小民日用之需部價旣多二釐則民間所費必不止於二釐廣西地瘠民貧道路遙遠應令鹽價平減以惠閭閻自乾隆元年爲始著照雍正元年原

題每斤減去二釐銷售○給予告滿漢大學士及部院尚書全俸
著爲令○甲辰戶部遵旨議奏各省防範私販請照兩浙兩淮見
行之例六十歲以上十五歲以下及年少之有殘疾者婦女年老
而孤獨無依者許其負鹽四十斤易米度日於不縣報名驗實註
冊給以印烙腰牌木籌每日赴場買鹽一次不許船裝至因地制
宜之處請令各督撫鹽政悉心妥議得旨依議速行○乙巳加上
列祖 列后尊諡○諭王大臣等天下之理惟有一中中者無
過不及寬嚴並濟之道也人臣事君一存迎合揣摩之見便是私
心而事之失中者不可勝數矣昔我 皇考臨御之初見人心玩
愒諸事廢弛官吏不知公事宵小不知畏法勢不得不加意整頓
以除積弊乃諸臣誤以 聖心在於嚴厲諸凡奉行不善以致政
令繁苛每事刻覈大爲閭閻之擾累然則 皇考之意果如是乎

朕卽位以來深知從前奉行之不善留心經理不過欲減去繁苛與民休息而諸臣又誤以爲朕意在寬遂相率而趨於縱弛如盜賊賭博之類漸已露其端倪而天津一帶鹽梟糾合多人肆行無忌若非總督李衛明曉政體參奏查拏其爲地方之害正非淺鮮又如寬賦一事諸臣動輒以關稅爲言不知關稅正額本無害於商民其爲商民之害者乃胥役之需索額外之誅求耳督撫大吏身任地方於此等事不能留心查禁以黈商因而但欲妄減惟正之供可乎見在各省督撫皆昔年 皇考簡用之人卽朕偶有除授亦係從前曾任封疆者乃當年條奏則專主於嚴而近日條奏又專主於寬以一人之身而前後互異如此是伊等胸中毫無定見並不計理之是非事之利病而但以迎合揣摩希冀保全祿位固結恩眷而不知大違乎 皇考與朕之本意適成爲庸鄙之具

臣而已若循此以往不知省改勢必至禁令廢弛奸宄復作良善受其擾害風俗漸就澆漓將我 皇考十三年教養整理之苦心功虧一簣此朕心所大懼者不得不懇懇過慮懇切告誡繼自今務去偏私之錮習各以大中之道佐朕辦理天下事務永底平康之治若因此諭又復錯會意旨以嚴刻苛細相尙則識見更爲庸劣其咎不可逭矣可將朕旨各書一道密寄各省督撫其中才識兼長不蹈此弊者原不乏人毋庸朕旨訓飭戒勉但伊等旣任封疆之重均有化導屬員之責亦一併傳諭知之○命鄂爾泰張廷玉等舉翰林科道部屬內品學兼優者考擢試差○丙午諭江南長江一帶向有貢獻鮐魚之例至康熙年間停止因而地方改爲折價向網戶徵收解充地方公用乃歷年旣久或網戶改業或移徙他方展轉牽連又加胥吏借端苛索遂致沿江捕魚之人代受

追呼之累朕思當年 聖祖仁皇帝停止貢鮮乃愛惜民力之至
意何用此些須折價煩擾小民著該督撫查明豁免永著爲例○
頒十三經二十一史於各省會及府州縣學○設盛京宗學覺羅
學○戊申諭兵部尙書傅錦朕聞今科會試遺卷內尙有佳卷目
今場事已竣朕於科場事宜不能深悉應如何加恩增中之處爾
可會同大學士鄂爾泰朱軾議奏○癸丑命續修國史○命鄂爾
泰等取會試薦卷三十卷年老舉人試卷五卷准一體殿試○福
建按察使覺羅倫達禮請定遇赦人犯再犯罪名條例 上曰遇
赦人犯如再犯加倍治罪之旨係恐其再犯使之知儆勉爲良民
耳朕何忍薄待吾民槩定一例以待人之再犯乎○甲寅以索柱
爲左副都御史仍兼內閣學士○乙卯諭廣東山海奧區貧民多
以捕魚爲業各縣俱有額徵漁課爲數無多相沿已久後因歸善

縣不肖知縣私取陋規加於額徵十數倍遂經撫臣定議加增漁稅一千餘兩作爲贏餘而海豐惠來潮陽三縣亦倣照加增海豐縣則增至四千餘兩惠來縣增至五百餘兩潮陽縣增至七百餘兩朕思粵東山多田少小民生計艱辛故以捕魚爲養贍之計今他縣漁租皆仍舊額而歸善等四縣獨徵收加重恐漁民輸納維艱非國家愛養黎元之意著將四縣加徵之數悉予豁免仍照原額徵收其捕魚小船尤不應在輸稅之內再查粵東有埠租一項亦民間自收之微利前經地方官通查歸公爲湊修圍基之費今圍基旣動公項銀兩修築則埠租一項亦著一體免徵以免閭閻之煩擾該督撫轉飭有司實力奉行毋使奸胥地棍借端私取致窮民不得均沾實惠○諭昨據尙書傅鼐奏稱各省來京會試舉人內有年歲七十八十以上者四十餘人志切觀光可否酌量加

恩錄用朕因令查落卷之大臣等一併簡閱續取中五人其餘未取者著交與禮部驗看酌量分別作何賞給職銜之處妥議具奏此等年老舉人朕格外加恩乃一時之曠典在伊等無心遭遇則可若心存希冀強赴公車以致皓首寒儒跋涉辛苦既啓僥倖之心亦非朕愛士恤老之意此事後不爲例著禮部通行曉諭知之○丁巳宗人府議處果親王允禮於三月初一日 皇上親詣

堂子安桿祭祀時託病不到應照例削去王爵奏入得旨允禮原應照所奏治罪但伊自辦理部務以來尙屬勤奮著免其削去王爵將特恩賞給親王之雙俸裁去並將加給一倍親王之護衛官員及護軍馬甲撤回○戊午命雲貴川廣福建舉人未經中式者著照雍正十一年例揀選○頒 聖祖仁皇帝御製周易折中性理精義朱子全書 欽定尙書傳說彙纂詩經傳說彙纂春秋傳

說彙纂儲於太學刊示諸生○命修舜陵並設歷代帝王各陵陵戶○己未諭劉於義奏許啓盛董仲俱非常赦所不原請准其贖罪朕前因官爵有關名器仕途不宜冒濫是以降旨停止捐納至於贖罪一條原係古人金作贖刑之義況在內由部臣奏請在外由督撫奏請皆屬斟酌情罪有可原者方准納贖其事尙屬可行嗣後將贖罪一條仍照舊例辦理○辛酉諭士子倚恃青衿抗欠國課定例褫革追比原以懲戒不率使知禮法至革後如能清完者准予開復所以廣自新之路也今直省所有雍正十二年以前舊欠錢糧俱已豁免此等革生內容有所欠錢糧亦已陸續完納止緣尾欠未清未會循例開復而所欠又奉豁免之恩詔遂令所革衣頂永無開復之期情殊可憫著各督撫轉飭各州縣查明前經欠糧革退之舉貢生監等實係抗欠不完褫革之後並未完納

者仍不准開復若所欠錢糧曾於革後陸續完納止有未清之尾
欠而適逢赦免之恩詔將褫革之案准其開復俾得改過自新並
將姓名登記檔冊儻此次邀恩之後將來再有抗欠之事著該督
撫嚴參治罪○壬戌吏部議覆御史鍾衡奏請加國子監從八品
助教爲從七品正九品學正從九品學錄爲正八品正八品監丞
加爲正七品從八品博士加爲從七品滿洲蒙古助教等缺品級
均歸畫一應如所請從之○癸亥諭提督總兵出境照例具題無
許擅離汛守○降圖理琛爲內閣學士以杭奕祿爲工部侍郎○
甲子張廣泗奏報合攻牛皮箐苗寨首逆就獲搜剿餘黨無算
夏四月庚午禮部遵旨詳議清釐僧道之法請令順天府奉天府
直省督撫轉飭該地方官於文到三月內將各戒僧全真道士年
貌籍貫焚修處所清查造冊取具印結申送彙齊到部發給度牒

轉飭地方官當堂給發各僧道收執遇有事故追出戴繳嗣後情願出家之人必請給度牒方准簪剃受戒如有僭名影射及私行出家者查出治罪至於應付僧人令地方官一體給與度牒若不願受戒者卽行勒令還俗其中老邁殘疾旣難受戒又難還俗者查實給與度牒看守寺廟以終天年又如深山僻壤不能遠出受戒及俗家並無可歸者亦姑給與度牒仍另行註冊永不許招受生徒至清微正一道士除龍虎山上清宮由真人給與印照各直省清微靈寶道士仍給部照毋庸給牒外火居道士俱令還俗年老不能還俗者亦暫給部照永不許招受生徒又尼僧亦應照僧道之例願還俗者聽其還俗不能還俗者亦暫給度牒永不許招受年少生徒嗣後婦女必年逾四十方准出家年少者嚴行禁止從之○以閻堯熙爲湖北按察使

由江西鹽

○壬申授王常海蘭

爲參贊大臣協同額駙策凌辦事○召吳應棻回部辦事以高其

倬爲湖北巡撫

由右通政遷

○乙亥命保舉賢良方正○丁丑諭山東

泰安州香稅朕已降旨豁免近聞湖北太和山凡遠近進香者亦

有香稅一項小民虔禮神明止應聽其自便不宜徵收香稅以滋

擾累所有太和山香稅著照泰安州之例永行豁免○命歸化城

設立養濟院○戊寅召楊秘來京以王士俊署四川巡撫

兵部

○庚辰以隋人鵬爲河南按察使

由少詹事遷

○辛巳以貴州提督哈

元生遲誤軍機命拏解來京○裁直隸副總河以總督兼管河務

○壬午諭捐納候選之貢監舉人仍准鄉會試○諭部員奉差學

政開缺後仍准推升○癸未命各部降革漢司員開復後准通算

前俸○以陳惠榮爲貴州按察使

由江西廣饒九南道遷

○丙戌諭八旗爲

國家根本從前敦崇儉樸習尚敦龐風俗最爲近古迨承平日久

漸卽侈靡且生齒日繁不務本計罔思節儉朕卽位以來疊沛恩
施無非欲令其家給人足反樸還淳惟是曠典不可數邀亦不可
常恃儻伊等不知痛改前非仍蹈覆轍則是下愚不移自取罪戾
可通行曉諭官兵人等其各敬聽朕言無負期望○戊子賜金德
瑛等三百四十四人進士及第出身有差○辛卯諭從來經學盛
則人才多人才多則俗化茂稽諸史冊成效昭然我 皇祖聖祖
仁皇帝道隆義頊學貫天人凡藝圃書倉靡不博覽而尤以經學
爲首重 御纂周易折中尙書彙纂詩經彙纂春秋彙纂等編又
有朱子全書性理精義正學昌明著作大備我 皇考世宗憲皇
帝至德同符孝思不匱特敕直省布政司將諸書敬謹刊刻准士
子赴司呈請刷印蓋欲以廣 聖教振儒風甚盛典也乃聞各省
雖有刊板而士子刷印寥寥蓋由赴司遞呈以俟批發旣多守候

之勞且一生所請不過一部斷不能因一部書而特爲發板開刷
士子所以欲多得書而其勢不能也朕思諸書實 皇祖惠教萬
世 皇考頒行天下之典籍安可不廣爲敷布著直省撫藩諸臣
加意招募坊西人等聽其刷印通行常以嚴禁胥吏阻撓需索之
弊但使坊賈皆樂於刷印斯士子皆易於購買庶幾家傳戶誦足
以大廣厥傳朕又思 聖祖仁皇帝四經之纂實綜自漢迄明二
千餘年羣儒之說而折其中視前明大全之編僅輯宋元講解未
免膚雜者相去懸殊各省學臣職在勸課實學則莫要於宣揚
聖教以立士子之根柢每科歲案臨時豫飭各該學確訪童生中
有誦讀 御纂諸經者或專一經或兼他經著開名冊報俟考試
文藝之後該學政就四經中斟酌舊說有所別異處摘取數條另
期發問止令依義條答不必責以文采有能答不失指者所試文

稍平順童生卽予入泮生員卽予補廩以示鼓勵務宜實力奉行以副朕尊經育才之意○壬辰布魯克巴部諾顏林沁齊墨喇卜濟親至西藏恭請 聖安並貢方物恩賞有加○癸巳免江南阜甯等州縣雍正十三年逋賦○吏部議准署湖廣總督邁柱奏湖南上崗下崗茅岡大刺等處改土歸流上下二崗請歸桑植縣轄大刺歸龍山縣轄茅岡歸永定縣轄從之

五月戊戌諭據兩廣總督鄂彌達奏本年二月內欽奉上諭凡行鹽地方大夥私販自宜嚴加緝究其貧窮老少男婦挑負四十斤以下者不許禁捕所有商人私雇鹽捕及巡鹽船隻幫捕汛兵悉行停止臣遵照部文出示曉諭各梟徒痛加悛改勉爲聖世良民乃省城各處竟有梟販成羣手執印刷小票稱奉廣東按察司明示許令販私不服盤查及查白映棠告示竟未遵奉諭旨分別老

幼混稱貧難百姓四十斤以下者不許緝捕儻敢私自查緝許被害之人指名赴本司衙門控告等語以致強壯奸徒無不藉口貧民公然販私成羣結黨目無法紀白映棠以刑名之官攬越鹽政率意妄行逞私債事其咎難逭理合奏聞臣今酌定規條凡有近場實在貧難無可資生之人如年過五十以外或在十五以內及並無依靠之癯獨老婦許其挑負四十斤以下在本境易米度日不許透越外境違者以私鹽論該場埠巡丁如有將貧難合例之人騷擾盤查者卽以誣指平民販私治罪其有年屬壯强者卽四十斤以下仍以私鹽究擬若有人鹽並獲齊非大夥私梟仍照舊例立即詳結不得株連至見設之巡丁巡船其界連場地者必須扼要巡查不便槩行停止又如廣西銷鹽各埠以及界連交趾私鹽衝賺之鎮安等處再福建之長汀江西之甯都皆大夥私梟出

沒之地亦難遽行停止仍請照前設立惟有責成各地方官隨時稽查儻有生事擾民者嚴加懲治等語朕因各省鹽務向來辦理未安不肖官吏往往縱放大梟拘拏小販以致濱海近場之窮民藉肩販以度日餬口者胥受擾害是以諭令寬其禁約毋許苛求原以惠養貧民並非縱容匪類聽其作奸犯科也豈知無賴之徒妄稱奉旨肆行無忌在直隸則有天津之事在江南則有鎮江之事在廣東則有廣州之事遠近一轍不約而同若不速加嚴懲則各處聞風效尤將大爲地方之擾害李衛之嚴密查拏鄂彌達之據實參奏此二人辦理乃深知朕心而洞悉政體者若天下督撫皆似此居心而不存觀望之念秉公執法則兇暴咸知斂迹必無長奸貽患之慮鄂彌達著交部議敘其鹽務條規卽照所奏行白映棠職司刑憲不特不禁約私梟反出示給票縱民爲匪甚屬溺

職著解任來京候旨朕自臨御以來時時以我 皇考愛養百姓之心爲心凡從前官吏之奉行不善涉於煩苛者皆次第革除務期與民休息若天下民人體朕此意改過遷善化頑爲良則朕寬大之政可以永遠施行此天下臣民之福卽朕之福也今則不然卽於私鹽一事朕本欲酌寬其禁以養恤窮黎而奸民乘機伺隙結黨呼羣凡向來之畏法而不敢輕犯者今則公然肆橫無所憚懾觀此情形是奸頑之民不容朕行寬大之政也朕爲天下主惟有執兩用中期與天下臣民休養生息以成久道化成之治豈肯姑息養奸貽風俗之憂釀閭閻之患哉爲此切加曉諭俾遠近百姓各自醒悟洗心滌慮務爲善良奉公之民以永受朕恩著各省督撫將朕此旨刊刻頒布務令遠鄉僻壤咸共知之○己亥以王恕爲廣東按察使

由江安糧道遷

○庚子諭國家以科目取士廷試之後

分別任用或選授庶常或分部學習或以縣令銓補此因材器使之道欲令士子各展所長裨益政治原非有用舍去取於其間也聞向來士子因詞林地望資格優於外任每以得預是選爲幸及至引見後輒於內用外用妄生計較此狃於習俗覓聞之陋而於朝廷優待士子之心實未深悉蓋今時縣令所轄土地人民等於古者侯伯子男之國撫綏經理實賴通材故親民之官所繫最重果其材猷政績卓然表著類皆不次超擢膺其任者何得不力圖報稱而更生企羨乎若身預詞林之選者其名實尤難相副蓋文詞不工於館職固爲有愧即使詞采可觀尙恐流爲浮華無用之士務各砥礪廉隅講求經術漸致淹雅宏通以無負選俊儲材之意至於在部學習人員分曹佐理各有攸司當念外省官吏措置偶或失宜尙有內部爲之駁正至部中所定章程一經奏准通行

將來卽引爲成例稍有舛錯貽誤不少安得不倍矢精勤期免隕越總之百司庶府悉非營利之階梯政事文章各有當修之職業務宜屏除私意勉效忠良庶幾識見日增猷爲日著士風吏治漸臻上理朕實於爾等有厚望焉○諭朕因李紱保舉新進士過多又聞伊在朝班將新進士派令九卿保舉特降諭旨詢問今據李紱奏稱同在朝房有諮詢擬議者從旁勸助臣實有之且曾向趙之垣言及新進士原承猷文藝頗工勸其保舉等語是李紱將伊私人派令九卿保舉之處已自認不諱伊又稱懷承訓誨惟有永絕妄言等語朕卽位以來並未有因臣工多言卽加以處分者今李紱明係妄舉乃自謂妄言避重就輕希圖蒙混著交部嚴加察議尋降補○辛丑命改進士單月選班銓選舉人○停止山西巡察○吏部議覆兵部侍郎吳應棻奏督撫衙門設七品幕職二員

兩司設八品記室二員三年一考報部存案六年考滿送部揆選道府州縣設一九品掾司申報督撫本人有出身者計考先用本官降革不准與考本官以贓酷敗不能救正定議處分後官得辟留前任幕賓升調亦可帶往他省等語查各省督撫幕賓雍正元年奉 旨令分別保題議敘布按二司爲通省錢穀刑名之總匯應准照督撫之例分別保薦其道府州縣各員到任即將幕賓姓名籍貫申報督撫存案六年勤慎無過辦事幹練准令本官出考申送各該督撫詳加考覈具題議敘濫行保舉照例議處至各衙門幕賓旣未設有定額去留來往聽其自便從之○壬寅諭朕聞河南彰德一府七縣共漕米三萬餘石而臨漳縣辦米三分之一他邑每畝徵米四五合或七八合不等獨臨漳每畝徵米一升三合有奇從前兌糧水次在臨漳境內同隆鎮是以額徵本色獨多

今水次移在湯陰縣五陵鎮臨漳運米必越安陽湯陰地方始到五陵且地方產米無多漳民辦運維艱等語朕思臨漳所辦漕米果多於他邑小民不無苦累若欲減運又有關於額賦其可否照附近水次之安陽湯陰等縣則例按畝徵米起運其餘改徵折色之處著傳諭巡撫富德查明酌議具奏○癸卯諭三代以前不言水利溝澮之制時蓄洩備旱潦尙書周禮所載爲田功計者其利甚溥開渠引水溉田育穀始於戰國蓋因阡陌旣開溝澮尋丈已失其舊也歷代言水利者得失參半總以相土宜順水勢近不擾民遠可利人爲主今江南所屬蘇松常鎮四府太倉一州見在興修支河倣河工海塘之例督撫分委降革廢員及本籍候選考職人等效力承修朕思渠港圩壩附近溉田原宜開濬以備旱澇但開濬之法須河身深廣蓄洩得宜其挑取塗泥遠移他處或培壅

下之地或築隄岸之上方爲久計若雇夫挑土堆貯河旁雨淋水
潦旋即入河不久淤塞務名無實徒滋煩擾至古隄舊渠僅遇旱
潦不爲田害便宜仍舊紛更改築甚無謂也今蘇松等處內地支
河原不比河工海塘之險古隄舊渠如元和至和等塘民利往來
田資灌溉至今受益吳本澤國三江震澤支流四溢如邱與權單
諤郝亶趙霖夏原吉周忱等所論水利考據精覈得失瞭然今效
力承修人員相度形勢諳練自遜前人僅有夾塘蓄水石梁洩河
止宜加修不必改築若有必應開濬建築之處督撫留心細勘並
飭州縣協辦工程一應調遣指臂易使至長洲等州縣按畝派錢
以供大修朕已降旨停止儻有官吏藉端中飽及絲毫派累經朕
訪聞必加嚴處嗣後督撫以至州縣建言爲民興利或利小而害
大或利在目前而害伏於後或有利無害而其事易創難成皆宜

詳審熟籌慎之於始以體朕惠養元元至意○甲辰諭聞山東青州府益都縣有前明廢藩更名地一項在當日爲藩封之產不納課糧招人承種輸租各佃止更姓名無容過割謂之更名地較之民糧多二倍至四倍不等在當日居民投靠藩勢借佃護身積漸增加沿爲陋例今則同爲民田而納糧尙仍舊額名爲欽租地糧多賦重小民輸納維艱朕心軫念著將欽租名色裁革照依該縣上等民地按畝承糧每大畝納銀二錢一分零每小畝納銀六分四釐零歸入民糧項下一體徵收俾循惟正之供永除偏重之累○諭朕聞各直省鹽政辦理之法各異如雲南所產井鹽俱係府州縣領銷派定額數由各鹽井領運分銷辦課不許越界販賣通行已久但府州縣繁簡不同民間生齒多寡不一凡兩迤衝繁之處人民輻輳不難照常銷引閒或缺鹽借之鄰近州縣協濟其山

僻州縣鄉村寫遠居民鮮少地方官恐蹈墮銷之咎閼礙考成遂將鹽斤分派里甲挨戶分食官鹽按限繳課名曰煙戶鹽小民家口多者可以照數納銀若貧民家口無多餘鹽未曾食盡及期催追前課未完後派之鹽又至展轉積累懸欠難償夫鹽爲小民日用必須之物慮民遠涉是以因地制宜不徒爲銷引計也乃一則患鹽之不足一則患鹽之有餘俱非均平之道著該督撫酌量變通悉心妥議務使官不墮銷民無偏累毋得拘於成見又聞雲南陸涼州地方馬廠等處瀕水低窪以樹藝升科未久其徵收夏糧秋稅有無累民之處該督撫一併查議具奏○丁未諭河南永城縣地方本年四月黃水忽發從江南碭山縣南下衝坍申公隄等處已切諭豫省巡撫加意賑恤潘家道口一帶地方年來屢遭水患自應亟爲疏通但此水下流多在江南宿虹等州縣若止挑濬

上源則水無歸宿著河南巡撫會同江南總督總河勘辦○命州縣修建六房公廨○庚戌諭江南浙江大吏化導士民痛改奢靡積習○免會靜張熙親屬緣坐○壬子命南河副總河移駐徐州○乙卯諭朕聞宣化府屬之懷來縣僻處山邊向有保字號墾荒地七十一頃徵糧八百六十餘石始於前明時防禦邊患募兵戍守卽以近山地土令其耕種每軍士一名種地五十畝者准作半年糧六石種地一頃者准作一年糧十二石彼時應募屯軍不過圖免本身雜差遂不計地之多寡荒熟今歷年既久其間有地荒而糧存者有地少而糧多者官民不免賠累之苦且該縣徵糧科則上地每畝徵糧五升六合中地三升六合獨此項地土則每畝徵糧至一斗二升民力尤難輸納著該督委員確查將山地不可耕糧無所出者共計若干奏聞豁免其可以耕種之地則按照本

縣科則分別定議俾邊塞黎民永沾實惠○暹羅國王參立拍照
廣拍馬嘯六坤司尤提雅菩挨表謝 欽賜扁額並貢方物賞賚
有加○丁巳諭刑部審訊出差朝鮮國正使兆德副使釋伽保知
伊等頒詔彼國時於餽遺正禮外復照舊日朝鮮陋例開都請別
請兩單私行授受自認不諱朕已降旨將兆德釋伽保交部嚴行
治罪因思朝鮮歸順我朝恪守藩封之職蒙我 列祖 皇考怙
冒深恩至優至渥卽如貢獻一節亦屢經裁減厚往薄來無非加
惠遠人之至意朕卽位以來又將該國餽送使臣禮儀令減半以
示體恤乃兆德等於正禮之外復受陋規其罪固不可追而該國
王卽照陋例應付亦屬不合若該國王能體朕心自當以恪遵諭
旨爲恭順不當以私厚使臣爲恭順也著禮部行文與該國王嗣
後凡有使臣奉差彼國務宜遵朕前旨將餽送正禮如銀兩物件

之類裁減一半至陋規所有都請別請等項悉行禁止不得私與一件既干功令復負朕懷遠之恩○己未諭朕夙夜孜孜任賢圖治惟期內外大小臣工共砥廉隅以襄邇理今列茲庶位者讀書科目之人不少正宜宣力國家以副朕望迺人品不齊拜官除職之際竟有不念官守之當如何而盡政事之當如何而舉輒咨問於缺地之豐嗇計較於養廉之多寡者士大夫聞之毫不爲怪良可慨歎抑或身任繁要而致羨於優閒或位列清華而垂涎於豐膺豈先資拜獻者之所宜出此哉董子曰正其誼不謀其利明其道不計其功士子稽古入官當以遠大自期安可謀食懷居甘自菲薄且朝廷設官各有分司惟當各盡職守主錢穀者必謹出納之數理刑名者必諳律例之條大僚有恭儉惟德之思一命有存心愛物之志豈可萌出位願外之妄想自曠當官之職業哉爲諸

臣者務宜痛自儆省咸思精白乃心靖共爾位不負讀書二字嚴
義利之界立廉恥之防庶幾風俗古而人心端斯吏治清而民生
厚朕實有深望焉○庚申諭朕前訪聞得原任江西巡撫常安回
京船過仲家淺開口於不應放閘之時嚇令開閘僕從多人聞官
畏其威勢躲避不敢過問常安遽行越漕起板將船放行朕隨傳
旨詢問常安伊乃多方掩飾蒙混回奏朕復降旨詢問總河白鍾
山令其據實奏聞今據白鍾山奏常安於三月閒船過仲家淺閘
僕從多人勒令開夫起板放船開夫不敢私起伊家人復扭開夫
蜂擁閘署倚勢嚇逼凌辱開官以致開官躲避常安遂起板前行
反將開夫掌嘴洩忿又常安盤至安山閘時伊家人兩次到閘喝
令起板開官任其無狀不敢違例放行等語常安身爲大臣於朕
卽位之初輒敢橫行如此此皆 皇考臨御時所未經見聞者及

朕降旨詢問伊復枝梧巧飾不將實情陳奏甚屬可惡常安著革職拏交刑部及伊生事家人一併嚴審定擬具奏朕御極以來見從前內外臣工不能仰體 皇考聖意諸凡奉行不善遂有流於刻覈之處是以去其煩苛與民休息並非寬縱廢弛聽諸弊之叢生而置之於不問也而內外臣民不喻朕意遂謂法令既寬可以任意疏縱將數年前不敢行爲之事漸次干犯卽如鹽禁稍寬乃朕優恤窮民之意而直隸江浙閩廣諸省私梟鹽棍輒敢招集無藉之徒肆行無忌見在查拏究處然此不過編戶小民不能深悉朝廷德意一時觸法犯禁猶可云愚昧無知至於常安乃封疆大吏豈不知憲典之當遵而亦爲此市井跋扈之舉乎朕看此等情形天下臣民竟有不容朕崇尚寬大之勢傳曰寬則得衆易曰元者善之長也朕以天地好生之心爲心豈肯因一二無知之輩卽

自改其初志但治貴得中若於玩法之徒亦用其寬則所謂積莠不除將害嘉禾儻不速爲整理恐將來流弊無所底止是以近日處分臣工數案如李紱之濫舉進士朕卽將伊降級調用勵宗萬之擅將監場御史咨送吏部處分福敏之辦理廢員推諉遲誤朕卽將伊等交部嚴察議處又如王常出口多騎驛馬數匹乃總理事務王大臣偶爾疏忽亦見在交部察議蓋此等事件在皇考時或可格外從寬而朕此時辦理則不便稍有假借良以玩忽縱肆之風漸不可長此風一長則寬不成其爲寬而民反有受其累者如李紱勵宗萬之事卽營私作弊之漸常安之事卽目無功令之漸懲一儆百爲治之道固當如是朕豈忽變而爲嚴刻者哉大凡人臣居心惟當以義理爲權衡而不可稍存迎合之見君所謂可臣或以爲否君所謂否臣或以爲可雖明旨已降尙不可依違

遷就而况妄行揣度以爲迎合乎且妄行揣度亦未有不至於大
誤者卽如 皇考當日至仁如天寬大慈祥惠鮮懷保時時以百
姓爲念上年朕奉 命辦理苗疆事務時 皇考憫恤黔民至於
墮淚此朕與諸王大臣所親見者其他不可枚舉乃臣下妄行揣
度頗以 皇考意主於嚴此豈能知 皇考之聖心者數月以來
又復妄行揣度以朕意在於寬是豈知朕之存心者若見朕於常
安李紱輩玩法營私之不少假借輒復妄行揣度以朕欲轉寬爲
嚴而於辦理兵民之事有意過刻致百姓或有失所是則私心蔽
錮識見卑污其罪更不可追矣總之治貴得中事求當理不當寬
而寬朕必治以廢弛之罪不當嚴而嚴朕又必治以深刻之罪內
而九卿百職外而督撫庶司咸當洗心滌慮各加儆省毋蹈前轍
自干咎戾則朕之百姓可以永久受朕寬惠之澤矣

尋部議上常
安應加責導

旨寬

○諭朕聞甘省以糧載丁從前辦理未善致多偏枯屯民甚

屬苦累見有民戶丁銀攤入屯戶者九千二百二十五兩屯戶輸納維艱朕心深爲軫念再四思維此種丁銀乃國家惟正之供並非無著之項止因從前岳鍾琪任意增減遂致苦樂不均今應酌籌變通之法以惠甘民著將此多攤九千餘兩暫爲豁免俟下屆編審之時將平慶臨鞏四府及新改直隸之秦階二州所屬各州縣新編人丁應完丁銀均勻攤入民地糧內漸次補額卽分作二次編審逐漸補足亦可務令徐徐增補以紓民力俟補足之後卽行停止永不加賦著署督查郎阿劉於義悉心妥議辦理朕又聞康熙五十七年伏羌通渭秦安會甯等縣及岷州衛有地震傷亡缺額之七千六百八十丁該銀一千四百八十六兩有零人口既無丁銀自應蠲免乃岳鍾琪亦攤入田糧之內尤屬錯謬著該

督等卽查明豁除毋貽民累朕又思甘省從前多係衛所管轄屯戶其屯戶額徵悉係糧料草束爲兵丁必需之物是以蠲免地丁時此項不在蠲免之內惟雍正十年 皇考格外加恩將民戶屯戶應徵各色糧草一槩豁免此從來未有之曠典也朕意民屯均爲赤子所當一視同仁兵食或有不敷再當別爲籌畫嗣後遇有蠲免地丁之年著將屯戶應納之糧草蠲免三分之一永著爲例○頒 聖祖仁皇帝御製律歷淵源於直省學宮書院○命直省州縣門軍坊以里民充○癸亥命科道內升外轉未得缺之先仍准食俸辦事○經略張廣泗奏搜剿大籌擒獲首兇並回兵辦理內地情形得旨覽卿奏報搜剿逆苗之事已有八九分就緒曷勝欣慰此皆卿調度得宜將士奮勇之所致也在事人員應各詳記俟事定後朕皆加恩賞賚趁此兵威大振之時切不可有欲速圖

功之志善後事宜切須計及萬全莫復遺後日之慮有人建議以爲牛皮大箐係逆苗窟穴恃以爲惡之一道若趁此兵力將大箐用火攻之法焚毀無遺則永無逆苗之害云云不知可行與否卿其酌量○江西巡撫俞兆岳奏民間斗斛之制宜畫一禁演扮淫戲以厚風俗等語得旨王者之道同律度量衡蓋以此民間日用最切之事而風俗之所關也宜令畫一之奏是不可有欲速之心致民間有所不便則得矣先王因人情而制禮未有拂人情以發令者忠孝節義固足以興發人之善心而媒褻之詞亦足以動人心之公憤此鄭衛之風夫子所以存而不刪也若能不行抑勒而令人皆喜忠孝節義之戲而不觀淫穢之齣此亦移風易俗之一端也汝試姑行之

六月甲子朔諭古者鄉學之秀始升於國其時諸侯之國皆有學

今府州縣學並建無遞升之法國子監雖設於京師道里遙遠四方之士不能胥會則書院卽古侯國之學也居講席者固宜老成宿望從遊之士亦必立品勤學爭自濯磨俾相觀而善庶人材成就足備朝廷任使學臣三年任滿諮訪考察如果教術可觀人材興起各加獎勵六年之久著有成效奏請酌量議敘諸生中材器尤異者准令薦舉一二以示鼓勵○加禮部堂官雙俸○調楊汝穀爲戶部侍郎以姚三辰爲兵部侍郎由內閣學士遷○丁卯諭國家制科取士經義代聖賢立言當循循矩矱先民是程非四子六經濂洛關閩之粹言不可闕入前蒙 皇考世宗憲皇帝特降諭旨以清真雅正爲主誠以文品人品恆相表裏雅鄭之分淄澠之別辨之不可不精也主司務矢公矢慎以襄盛典○諭朕御極以來日理萬幾早夜孜孜惟恐政事稍有曠廢屢頒諭旨訓誡臣工務期

百度具舉無稽留淹滯之弊以副朕勵精求治之心近因天氣炎暑聞八旗六部大臣惟恐朕躬煩勞欲將當奏之事擇其緊要者奏聞引見之人擇其緊要者引見其餘則俟之秋涼之後此則不知朕心者朕辦理天下事務寒暑有所不避豈肯自圖晏安况批閱奏牘引見官僚亦不至過於勞瘁卽彼引見之人雖受暫時之熱而得早被錄用諒亦不以爲苦嗣後可照常奏事引見不必有意減少○禮部議覆山東巡撫岳濬奏奉旨修葺堯陵廟宇因備稽史傳俱稱堯陵在濮州境內東平一陵實屬沿誤應移東平堯陵估計重建工料改建濮州堯陵等語按呂氏春秋兩漢志水經注文獻通考堯陵在漕濮間無疑考一統志所載亦俱相符其祀堯於東平州者緣金末河決舊迹無存明洪武開始於東平葺陵建廟應令該地方官確勘濮州城東南六十里穀林舊址詳加料

估動項興修於陵前設堯母靈臺祠配以中山夫人悉如舊制逢祭告大典遣官行禮東平一陵有司以時展祀從之○戊辰諭各省學政俱已賞給養廉資其用度惟雲南舊有文武新生餽送費儀數金之例足敷公署之用相沿已久是以未曾議及養廉朕思新進寒士卽措辦數金仍屬拮据此項應行禁止其學政養廉著每年另賞銀四千兩於司庫銅息內照數支給永著爲例○命各省提督總兵進京照督撫例不必赴部投文○己巳禁私造烏槍○命修築貴州苗疆州縣城垣○以慶復署吏部尙書仍兼管戶部事務○辛未諭易名以諡古之制也自周公定爲諡法後世帝王未有無諡者明建文爲太祖之嫡孫繼承大統在位四年固儼然天下共主矣及成祖旣立有其天下並去其年號而史官所書則仍稱爲建文元年二年三年四年此國之所賴有信史也然不

繫之以謚而稱之曰建文皇帝此俗稱非史體也傳之後世殊爲
闕典考之太祖有元之天下而謚元主爲順帝我世祖章皇帝
代明之天下而謚明主爲愍皇帝雖更姓改物之君尙且追諡而
無所嫌忌况當其世者乎宏治以來如楊循吉諸人屢以爲請迄
寢不行皆以後世子孫席有成祖之業故不敢變亂舊章而不慮
其貽譏來世也我國家謚崇禎而不謚建文者以明史未竣非當
時所急今史書旣成若不及此追諡良爲遺憾著大學士九卿會
議確擬具奏候朕親加裁定○定江南水利歲修○癸酉授張廣
泗貴州總督兼管巡撫事以尹繼善爲雲南總督專辦雲南事
州料理善後必事○以劉統勳爲內閣學士由詹事○甲戌領工部
權歸一專責成也○見用營造官尺式於直省凡工程俱用部頒○乙亥革提督衙門
白役○丙子諭明罰敕法國之大典而肆赦所加原以昭法外之

仁也恩詔之頒期以息事甯人使遠邇咸知遷善改過共爲良民
以成太平之治聞各省於一切案件仍行提審駁審嚴刑酷夾恣
意株連使無辜之人困於囹圄細微之事刻爲鍛鍊含冤稱屈所
在多有夫罪名未定案情未協或仍有須審詳者但旣非犯在不
赦則斷讞亦易成招若使合於赦款之人不得卽邀赦免之澤而
已酷刑斃命或因拖累破家則後卽審明援赦亦已無及是朝廷
已生全之而有司故戕害之藐視功令殘虐民生莫此爲甚且頒
詔之後已逾半年而題結咨結批結之案尙屬寥寥遲玩已極著
刑部卽行文各該督撫速行嚴飭各屬立即詳慎查明逐一詳報
歸結省釋如有仍前濫刑擾累及搪延滋弊以阻抑國家德意者
一經察出罪有攸歸斷不輕貸卽刑部所有案件亦應速爲剖晰
勿致沈閣以副朕哀矜庶獄之意○己卯諭昔我 皇祖聖祖仁

皇帝闡明經學嘉惠萬世以大全諸書駁雜不純 特命大臣等
纂集易書詩春秋四經傳說 親加折衷存其精粹去其枝蔓頒
行學校昭示來茲而禮記一書尙未修纂又儀禮周禮二經學者
以無關科舉多未寓目朕思五經乃政教之原而禮經更切於人
倫日用傳所謂經緯萬端規矩無所不貫者也昔朱子請修三禮
當時未見施行數百年間學者深以爲憾應取漢唐宋元以來註
疏詮解精研詳訂發其義蘊編輯成書俾與易書詩春秋四書並
垂永久其開館纂修事宜大學士會同該部定議具奏○諭國家
以經義取士將使士子沈潛於四子五經之書含英咀華發摠文
采因以覘學力之淺深與器識之淳薄而風會所趨卽有關於氣
運誠以人心士習之端倪呈露者甚微而徵應者甚鉅也顧時文
之風尙屢變不一苟非明示以準的使海內士子於從違去取之

介曉然知所別擇專意揣摩則大比之期主司何以操繩尺以度羣才士子豈能合矩矱以應拔羅乎有明制舉之業體備各種如王唐歸胡金陳章黃諸大家卓然可傳本朝文運昌明英才輩出劉子壯熊伯龍以後作者接踵莫不根柢經史各抒杼軸此皆足爲後學之津梁制藝之科律者自坊選之禁垂諸功令而大家名作不得通行士子無由覩斯文之炳蔚率多因陋就簡剽竊陳言襲取腐語聞或以此倖獲科名又展轉流布私相倣效馴至先正名家之風味邈乎難尋所繫非淺鮮也朕欲裒集有明及本朝諸大家時藝精選數百篇彙爲一集頒布天下以爲舉業指南學士方苞工於時文著司選文之事務將入選文逐一批抉其精微與突之處俾學者了然心目閒用以拳服摩擬再會試鄉試墨卷若必俟禮部刊發勢必曠日持久士子一時不得觀覽嗣後應弛坊

開刻文之禁儻果有學問淹博手眼明快者不拘鄉會墨卷房行
試牘准其照前選刻但不得徇情濫薦及狂言橫議致釀惡俗朕
竇嘉惠士子望各精勤厥業以底大成尙悉敬體朕意共相黽勉
○諭朕惟州縣爲親民之吏自宜廉平不擾懋著循聲乃獄訟催
科之際官民情意易致睽隔百姓潛受苦累而無由自訴者則以
書役之爲害甚劇州縣官不知所以振刷而剔除之也朕訪聞直
省州縣衙門經承之外必有貼寫正役之外每多白役此數十輩
無賴之徒假託公務橫肆貪饕其爲小民擾累何可勝言故有訟
獄尙未審結而耗財於若輩之手兩造已經坐困者矣額糧尙未
收納而浮費於催徵中飽於蠹胥已什去二三矣其餘勾緝命盜
因緣舞弊遇事風生株連無辜賄縱要犯大率貼寫白役之爲害
居多各直省督撫務宜嚴飭各該州縣將所有吏役按籍鉤考其

有私行充冒者悉行裁革設正額書役實不敷用不妨於貼寫幫役中擇其醇謹者酌量存留亦必嚴加約束毋得非時差擾至於經承正役務須時刻稽查儻有壞法擾民之事立即按律重懲庶使若輩知所顧忌不得肆其伎倆儻或明知故縱姑息養奸又或喜其巧於趨承受其蒙蔽此則不愛百姓而愛吏役卽屬戕害吾民之甚者也爲民父母其忍出此乎且胥吏之爲害不止州縣衙門已也凡徵解錢糧上司書吏輒向州縣書吏索取費用因而縣吏假借司費紙張名色派索花戶又如徵解漕糧時糧道衙門書吏需索縣吏規禮因而縣吏遂勾通本縣家人盤踞倉廩於正額外多收耗米稍不遂意百般留難遠鄉小民以得收爲幸守候爲艱不得不飽其貪婪又聞司院衙門凡州縣申詳事件每先發各房書吏擬批送籤書吏從此作奸射利遲速行駁之閒得以上下

其手蓋銜蠱之爲擾自上及下正不自州縣始也是在爲督撫者
整肅紀綱立閭省之表率而監司守令各奉厥職互相糾正則弊
絕風清民安衽席朕惠養元元之恩意得以周浹閭閻矣○癸未
諭國家命官分職亮采宣猷固欲各矢公忠共襄國事然必俯仰
無憂而後可以專心效職朕臨御以來洞知京員俸祿所入未足
供其日用深爲廑念止以量入爲出國有常經必須籌畫周詳始
可施行久遠今查得戶部有平餘銀兩係各省與正供隨解之項
每年約有十六七萬金不等此項銀兩在內在外原存儲以備公
事之用者若卽以分給部院辦事之人作爲養廉於情理亦爲允
協著總理事務王大臣等查明部院各衙門事務之繁簡官員之
多寡其原有飯銀已足敷用者無庸賞給其不敷者酌量加添其
向來並無飯銀者酌量給與至翰詹京堂等衙門雖事務不繁而

淡薄較部院更甚均當令其一體沾恩可按數分派詳悉妥議具奏再外省武職俸祿之外尙有心紅紙張及親丁名糧之屬而旗員別無養廉此亦久塵朕懷者前已加恩將步軍營之章京等量給空糧資其用度今參佐等員其有空糧者無庸賞給外其未經賞給者亦應照例分別賞給以昭朕優恤文武臣工之至意其妥議具奏○乙酉禁百工當官貼費○丙戌諭朕聞三代聖王緣人情而制禮依人性而作儀所以總一海內整齊萬民而防其淫侈救其彫敝也漢唐以後蠱備郊廟朝廷之儀具其名物藏於有司時出而用之雖縉紳學士皆未能通曉至於閭閻車服宮室飲食嫁娶喪祭之事皆未嘗辨其等威議其度數是以爭爲侈恣而耗敗亦由之將以化民成俗其道無由前代儒者雖有書儀家禮等書而儀節繁委時異制殊士大夫或可遵循而難施於黎庶本朝

會典所載卷帙繁重民間亦未易購藏應萃歷代禮書並本朝會典將冠婚喪祭一切儀制斟酌損益彙成一書務期明白簡易俾士民易守著總理事務王大臣會同該部從容定議○以程元章署禮部侍郎實授補熙漕運總督由松江提督遷○丁亥禁四川松潘各鎮將私斂番民○戊子諭外省知縣由正途出身任內無參罰者按其資俸行取來京以主事補用其有廉明公正之員或因公望誤與例不符者亦准督撫保題此古三載考績之意所以簡賢能錄功最也但各部主事設有定額一年之中出缺無幾又有應補之人則行取來京之員挨班選授三年內必不能用完而下次行取之期又至日積日多勢將有遲至四五年不能得缺者朕思此等人員服官供職著有成效故特予行取以優待之今令其遽離原任需次選曹在彼不免守候之苦而外任轉少一諳練之縣令

殊爲可惜所當酌量變通者嗣後行取屆期該部將合例之人具題後知會督撫照武官保舉註冊之例仍留本任辦事俟單月缺出接俸銓補得缺之後給咨引見再赴新任庶各員不至去官守選轉多壅滯之虞而外吏得以駕輕就熟仍司牧民之職其如何定例之處吏部詳議具奏○前任甘肅巡撫許容以隱匿災荒營私樹黨革職解京治罪○辛卯諭國家設官所以甯人也京師爲輦轂之地五方之人雲集輻輳是以於五城分命滿漢御史及兵馬司正副指揮吏目等官糾察而稽查之又有步軍統領專掌九門巡捕營員查匪類緝盜賊察賭博等事犯者輕則自行懲治重則送部究擬立法亦綦詳矣嗣以外城街巷孔多慮藏奸匪各樹柵欄以司啓閉因而設巡檢官數十員於在京考職候選雜職人員內揀選補用此等之人本係微職一廝斯任妄謂得操地方之

權所用衙役率皆本地無藉之徒望風應募遂於管轄之內欺詐愚民遇事生風多方擾累甚至卑陋無恥散帖紋分苛索銀錢官役分肥於地方並無查察防範之效而司坊各官反得推諉卸咎又安用此冗雜之員也著將巡檢槩行裁革其柵欄仍照舊交與都察院五城及步軍統領酌派兵役看守至裁退之各巡檢著都察院分別等次交部酌量補用其未補者仍歸伊等原班銓選○命查勘江南江西被水村莊酌免本年額賦○命直隸新舊營田歸州縣管理○壬辰諭督撫爲封疆重臣一省數千里之間吏治民生寄焉所以激濁揚清風示羣吏者莫要於糾劾貪暴刻深苟且昏惰之守令所以移風善俗綏靖良民者莫要於訪拏地棍衙蠹生事不才之生監然是二者真知確見而盡得其實其道甚難何則督撫所寄耳目者不過二三投契之監司或朋好族姻及多

年相信之家僕凡人公正無欲忠信不欺而才智又能不爲人所欺者千百中無十一儻寄耳目非其人則將以除奸而轉爲售奸之藪將以剔弊而適開叢弊之門其顛倒枉直擾害閭閻有不可勝言者蓋守令之巧詐者多工於掩飾周旋而安靜悃悃清白自守之吏率不能迎合監司彌縫督撫之左右苟寄耳目者以私意爲愛憎以毀譽爲公評漫聽浮言捏構條款督撫信爲誠然或且惟恐不然則彈章朝上眾口多譁縱復自悔孰能認過深文苛法務實其事以自直朕所前聞往往若此至於劣生棍蠹訪聞不實片紙發行卽時扭解縱能虛心體察昭雪釋除而其人已身殘家破矣又况箠楚之下何求不得誣證屈服者沈冤豈能更白乎夫政貴有經事求得實督撫果能公忠體國實意爲民於所屬守令平日訟獄催科馭吏臨民之實蹟一一留心而察之其人之明暗

公私仁暴十可八九得然後驗以民情之向背酌以眾論之參差則舉劾自無大謬矣至於劣生棍蠹剝蝕地方良懦編氓莫不痛心切齒特無力首告恐轉爲所害耳如果諄切曉示凡被害之家許據實上控不以越訴格而不行立即親提證據審實無虛重懲不貸其誣告者罪亦如之則法在必行民知可信將宿惡寒心朋奸斂迹既無用以蜚語流言循訪拏之故事而懷怨挾讐欲相傾陷以快其私者更何以逞焉繼自今各直省督撫宜爭自砥礪布實德於斯民以無負朕委心倚任俾專制一方之至意也○直隸總督李衛奏巡查鹽梟情形得旨此事阿揚阿並未陳奏卿但盡心辦理若果問心無愧他人之萋斐豈能動朕是以朕之保全諸臣皆諸臣之自保全也何則朕豈能以己之好惡爲朝廷用人去取之章本乎○河南按察使隋人鵬奏巡撫富德吏治廢弛操守

難信定例故違紛更滋弊四款得旨撫臣之去留豈汝等藩臬一摺所能搖動朕聽哉能贊助者竭力贊助之不能贊助者虛心平氣聽撫臣之自處若撫臣有大過亦終不能逃朕之洞鑒也若此摺之奏功過居半何則富德之器原非朕十分賞識但汝若一字不密則是自取罪戾也